

LES
INTERESTS
ET
MOTIFS

QVI DOIVENT OBLIGER LES
PRINCES CHRESTIENS ET AVTRES
Estats de l'Europe, à restablir le Roy
de la Grand' Bretagne.

*Par un Gentilhomme François, affectionné à la
Couronne d'Angleterre.*



A PARIS,

Chez FRANÇOIS PREVVERAY, grande
ruë de la Bretonnerie, proche la porte
Saint Jacques.

M. DC. XLIX.


Casse

F

29

326

1649




AV LECTEUR.

IE suis du nombre de ceux, que le Cardinal de Richelieu poussa hors de France sous le regne du feu Roy; Si c'est une consolation d'avoir des compagnons dans la misere, j'en trouvoy un bon nombre, & de haute condition en Angleterre.

La Justice & bonté que j'ay veu reluire dans la personne du feu Roy d'Angleterre, avec la protection dont j'ay jouy quelques années dans ses Estats, m'ont obligé de tracer ce discours avec plus de Zele pour le bien commun de la Chrestienté, que d'art & d'eloquence pour chatouiller les oreilles delicates.

L'on aura peine à juger par mon discours de quelle Nation ie suis, & quelle Religion ie professe; Ce n'est pas que ie veuille cacher, ny l'une ny l'autre, au contraire ie fais gloire d'estre François, & beny Dieu d'estre Catholique. Mais puis qu'il est necessaire que j'entre dans les interets de toutes les puissances de l'Europe, qui different, & dans la Politique & dans la Religion, pour les esmouvoir à la vengeance d'un parricide execrable, & au retablissement d'une Monarchie des plus legitimes de la terre; Il a fallu que ie me sois despoüillé de la partialité, que la naissance & la Religion inspirent, ou doivent inspirer dans le cœur de chaque particulier.

Nunc tua res agitur
Paries dum proximus ardet.



*LES INTERESTS ET MOTIFS
qui doivent obliger les Princes Chrestiens, &
autres Estats de l'Europe à restablir le Roy de
la Grand' Bretagne.*



L n'y a rien de si absolu dans la Politique, & mesme dans la vie Ciuile que l'interest propre; C'est vne inclination souueraine qui naist avec l'homme & avec les Estats, & qui se declare la premiere, elle ne rend hommage qu'à elle mesme; le sang, le deuoir & la Iustice luy obeïssent, & la Religion est souuent contrainte de plier & de s'accommoder à ses mouuemens.

Interest gene-
ral de toutes les
Puissances del a
terre.

Mais quand cét interest propre en enferme d'autres, qu'en nous procurant du bien à nous mesme, nous en faisons à nostre sang, que nous nous acquitons de nostre deuoir, que nous suiurons les regles de la Iustice, & que nous affermissons les Autels, ce seroit vne folie extreme que de ne le pas suiure, puisquel'on choqueroit inutilement toute sorte de droits; Et nostre propre ruine ne puniroit pas suffisamment nostre erreur, puis qu'elle en entraîneroit tant d'autres avec elle.

C'est vne grande illusion dans la Politique, de croire que la ruine d'une puissance soit l'affermissement de l'autre: Dieu qui n'a pas moins trauaillé à la conseruation de ses ouurages qu'à leur production, a enfermé de la sympathie & vn support reciproque dans les choses de mesme nature. Les Couronnes sont enchainées & s'entretiennent les vnes les autres comme les pierres d'une arcade, dont l'une ne scauroit tomber sans ébranler toutes les autres; C'est vouloir perdre son logis que d'embraser celuy de son voisin, ou de ne pas courir à l'eau quand le feu en a gagné les poutres & le gros mur.

Tout ce monde n'est qu'une grande Monarchie, de la-

quelle Dieu est le Souuerain, chaque Royaume ou Republique en fait vne Prouince, & les Roys ou Souuerains Magistrats des Republiques en sont autant de Gouverneurs & de Lieutenants; si l'ennemy attaque quelque Prouince, toutes les autres & principalement celles qui sont les plus voisines, ne sont-elles pas obligées de luy prestre du secours? Et ne sont-elles pas plus capables d'arrester l'inuasion de leur ennemy, si elles joignent toutes leurs forces dans le commencement, que si elles attendent qu'il soit victorieux & grossi des despoüilles d'une Prouince? Mais quand avec cét interest de conseruation propre, il y va del'honneur de ce commun Souuerain, que sa personne sacrée est offencée, toutes les Prouinces ne seroient-elles pas criminelles de ne se pas sacrifier pour vne si juste & si glorieuse vengeance? Hé quoy n'est-ce pas s'attaquer à Dieu, ce Monarque vniuersel, que de deschirer ainsi l'une de ses Images sacrées? Et les Roys comme depositaires de sa Puissance Souueraine, & Ministres de sa Iustice sur terre, ne doiuent-ils pas chastier vn meurtre execrable exercé sur l'un de leurs Collegues?

Que c'est l'interest des Estats
democratiques
& Aristocratiques,
aussi bien
que des Monar-
chiques.

Peut-estre que les Estats Democratiques & Aristocratiques, me diront que ce Morif ne les regarde pas; mais qu'ils sçachent que dans cét interest general, par le nom de Roy j'entends toute Puissance Souueraine, soit qu'elle reside en vne ou en plusieurs personnes. Il faut considerer aussi que les Anglois rebelles n'ont pas renuersé la Monarchie pour maintenir leur Religion, ny pour deuenir plus heureux, bien au contraire l'Angleterre n'eust iamais plus de semences de malheurs; & de plus la Monarchie Anglicane est le plus doux & le plus juste gouuernement qui se puisse souhaitter, & dont le feu Roy n'a iamais vsé tyranniquement, comme nous ferons voir cy-aprés. Pour la Religion on sçait que toutes celles qui pretendent à la reforme auoient vne entiere liberté en Angleterre, & puis ce n'est pas de quoy se picquent les Fairfaciens; Mais nous parlerons de cela plus amplement en son lieu: Faisons voir maintenant, que ce n'est pas l'interest de la Monarchie seulement, mais encore celuy de toutes les Puissances qui gouernent les peuples par la lumiere de l'Euangile & par celle de la raison, de venger la mort du Roy d'Angleterre

d'Angleterre par des chastiments proportionnez à leur crime, & l'injustice qu'on luy a faite en luy rauissant la Couronne, par vn reſtaſſement ſolide de Charles ſecond ſon Successeur. Ce raisonnement roulera ſur deux points, ſur la Religion, & ſur les Loix fondamentales de chaque Eſtat. Commençons par la Religion.

La Religion eſt la piece la plus neceſſaire pour la felicité des Eſtats, elle en doit eſtre la baſe & le fondement, non ſeulement, parce qu'elle vnit l'homme à Dieu, qui eſt l'arbitre de toutes choſes & le Pere de la Paix, mais encore parce qu'elle vnit les hommes entre eux par vne conformité d'opinions, de mœurs, de couſtumes, & d'exercices, & par l'eſpoir d'une meſme recompense: Tous les Fondateurs de Monarchies & de Republiques ont eu ſoin auant toutes choſes d'eſtablir la Religion, ou du moins la ſuperſtition ſa ſœur baſtarde, & ont taſché autant qu'ils ont pû de former ſur ce point de fermes & inuiolables maximes, pour aſſembler tous les cœurs des ſujets dans vne meſme croyance touchant la Diuinité; En quoy l'on admire particulièrement la prudence de Numa, qui trouua ce moyen tres-efficace pour appriuoifer l'humeur farouche de ces Paſteurs, qui depuis ont veu tout le reſte du monde ſoumis à leur domination.

La Religion
neceſſaire pour
la felicité & af-
fermiſſement
des Eſtats.

Ce fondement de la felicité des Eſtats fut-il iamais plus eſbranlé que par les meurtriers du Roy d'Angleterre? qui authoriſent ſuperbement toute ſorte de libertinages & d'impiétéz, & qui ſont montez à ce point d'orgueil & d'atheisme, qu'ils nomment leur Religion independante, comme s'ils ne vouloient pas ſeulement releuer de Dieu. Si l'on permet cette licence à vne troupe de ſoldats effrenez, & qu'on laiſſe prendre racine à leur impiété & à leur tyrannie; y a-t'il aucun Eſtat qui puiſſe regner en ſeureté, & cét exemple n'eſt-il pas capable d'inspirer les meſmes deſſeins, à tous ceux qui ont entre leurs mains les forces des Puiffances Souueraines? Ce venim d'indifference dans la Religion ne peut-il pas paſſer la mer, & ſe gliffer dans les eſprits des peuples, pour y former vne tour de Babel & de confuſion, capable d'envelopper dans ſa ruine les Religions eſtablies de longue main, & vniuerſellement reçues dans chaque Eſtat.

Mais ce mal-là va bien plus avant, & a vne estenduë bien plus generale, comme remarque tres-sagement le Marquis d'Ormond Viceroy d'Irlande dans vne Harangue qu'il prononça dernièrement dans l'assemblée des trois Estats du parti Catholique de ce Royaume-là, pour les encourager au reſtabliſſement de leur Roy. *La Religion*, dit-il, *non pas reduite dans ces definitions serrées par les differents moyens que ce ſiecle a inuentez, mais la Religion Chreſtienne eſt le fondement de noſtre querelle, laquelle certes eſt autant ou plus ébranlée par les impietez & libertinages de ce temps, qu'elle ne le fuſt iamais par les plus barbares, & les plus declaréz ennemis du Chriſtianisme.* Ce n'eſt pas vn Catholique, c'eſt vn Protestant qui parle, & qui parle à des Catholiques.

Les Loix anciennes & les plus propres à ranger les ſujets.

Et dans vn autre endroit de la Harangue, voicy comme il entre dans l'autre appuy des Estats, qui ſont les Loix & la Juſtice. *Les Loix fondamentales, & les Conſtitutions venerables de vos Anceſtres ſont foulées aux pieds par vne troupe de Scelerats, qui ne ſont notables que par leurs crimes & par leurs impietez.*

Il n'y a rien qui rende les Loix ſi venerables cōme leur Antiquité, ny rien qui les rende moins ſuſpectes, parce qu'on ne peut pas accuſer le Legislatteur de les auoir adjuſtées à ſa paſſion & à ſon intereſt, comme fit le Parlement de Londres au commencement des troubles, qui forma vne Loy pour condamner à mort le Comte de Strafford Vice-Roy d'Irlande, ne le pouuant faire par aucune Loy eſtablie, laquelle Loy fut auſſi-toſt eſteinte que ſa vie, pour ne pas allarmer pluſieurs perſonnes, & meſme pour l'interreſt des Legislatteurs qui pouuoient perir par cette Loy, qui pour fondement & raiſon n'auoit que l'enuie, la crainte & l'ambition de quelques-vns. Ie diſ donc que les hommes ſe ſoumettent d'autant plus volontiers aux Loix qu'elles ſont plus anciennement eſtablies. On les nôme fondamentales, parce qu'elles ſeruent de fondement à la felicité des Estats, ceux qui les renuerſent, eſbranlent fort l'Edifice, & il n'y a rien de ſi dangereux que d'abolir d'anciēnes Loix pour en créer de nouuelles. La Republique Romaine a trouuē ſa ruine dans ce changement, & la Loy Chreſtienne ne ſ'eſt pû eſtablir que par la mort du Legislatteur, par la deſtruction de Ieruſalem, & le ſang de pluſieurs millions de

Chrestiens. Toutes les Histoires sont pleines des desastres qu'ont cousté de tout temps les changemens de Loix, de Religions & de Coustumes, & personne ne doute que cela ne diminuë beaucoup la felicité d'un Estat.

Qu'à fait l'armée de Fairfax en gourmandant le Parlement de Londres, en renuersant la Religion de l'Estat, & en rempant ses mains sacrileges dans le sang de son Roy, sinon de donner un exemple funeste aux esprits ambitieux de violer toute sorte de droits; & si ces mal-heureux trouuent de l'impunité dans leurs crimes, n'est il pas à craindre que l'encouragement que d'autres esprits de pareille trempe en pourront tirer, ne fasse repentir les puissances de l'Europe d'auoir esté si lentes à venger un Roy, qui n'a point d'autre crime, sinon de s'estre opiniastré pour la Religion & les Loix fondamentales de son Estat.

Descendons à des interests plus particuliers, & communs pourtant à tous les Princes de l'Europe.

Il n'y a point de Prince dans l'Europe Chrestienne, qui ne puisse legitiment esperer que luy ou ses successeurs porteront un iour la Couronne d'Angleterre si la Monarchie subsiste, parce qu'elle tombe en quenouille; Nous auons diuers exemples, & entre autres, Louis XII. Roy de France, espousa la fille de Henry VII. Roy d'Angleterre, Philippe second Roy d'Espagne, espousa Marie fille de Henry VIII. & furent tous deux Roys d'Angleterre; François II. Roy de France, espousa Marie Stuart Reyne d'Ecosse, de laquelle sont descendus le Roy & les Princes d'Angleterre d'aujourd'huy, non pas de ce liët-là pourtant, car François la laissa veufue sans enfans; Le Prince d'Orange d'apresent a espousé la sœur du Roy d'Angleterre; de façon qu'il n'y a point de Prince dans l'Europe qui ne puisse aspirer à la Couronne d'Angleterre par droit de mariage, puisque le Royaume tombe en quenouille.

N'oublions pas un interest plus important & plus general que celui-là, que me viennent de fournir les dernieres nouvelles d'Angleterre, qui portent que Fairfax a fait alliance avec le Turc par un Deputé nommé Bond, qu'il a enuoyé vers le Grand Seigneur en qualité de Chef de Republique, &

Que tous les Princes de l'Europe peuuent pretendre d'estre Roys d'Angleterre.

Le Turc peut tirer de grandt aduantage de la mort du Roy d'Angleterre si elle n'est veuue.

que les Juifs marchandent l'Eglise Cathedrale de Londres pour y faire leur Synagogue; Et de vray ces barbares, ces impiés, ces meurtriers de leur Roy, s'estât rendus par tant de crimes odieux à toute la Chrestienté, ne scauroient attendre aucune Communauté de Religion & d'interest qu'avec les Juifs & les Turcs. Ils ont persecuté les Catholiques, ils ont persecuté les Huguenots, ils ont persecuté les Protestants, bref ils ont renuersé les Autels de tous ceux qui adorent vn I E S V S Crucifié. Les Eglises de Londres ne seruent à present qu'à loger des soldats, & à faire des corps de garde, ou à faire traualier les pauvres comme on fait à Lyon & ailleurs pour les empêcher de gueuser, c'est establissement-là ne seroit pas mauuais, s'il ne donnoit pas au monde, ce qui appartient à Dieu en prophanant les lieux destinez pour sa gloire, & pour les adorations des hommes. Je ferois vn volume si ie voulois descrire tous les sujets qu'ils ont donné aux Princes Chrestiens de rompre avec eux en violant le droit des Gens & de l'Hospitalité, en enfraignant les traittez, en pillant les maisons des Ambassadeurs, & en commettant d'autres iniustices & violences qui seroient trop longues icy à rapporter; Il s'est imprimé depuis quelque temps vn Liure qui en traite amplement, & que j'ay trouué conforme à la vérité, ayant esté moy-mesme tesmoin oculaire de tout ce qu'il rapporte. Ce Liure est digne de ceux qui sont curieux de la Politique & de l'Histoire.

Ce Liure se
trouue chez
l'imprimeur de
ce discours.

Tellement que pour deux raisons il est necessaire que les Fairfaciens s'vnissent estroitement avec le Turc, ie ne dis pas seulement par leurs inclinations, mais par leur detestables interests, d'autant qu'ils scauent tres-bien qu'il est impossible que les Princes Chrestiens contractent aucune alliance avec eux, & que de l'autre costé leurs impietez & leurs barbaries leur donnent des craintes & des deffiances qui ne leur permettent pas de suiure d'autre Politique que celle de Tunis & d'Alger; Mais le puissant & commun ennemy de la Chrestienté, peut-il auoir vn plus grand pied dans l'Europe, que celuy que luy donnera l'alliance d'une Isle si puissante en hommes, en vaisseaux & en argent, cét interest regarde les Autels & les Sceptres. Si le fondement en semble vn peu esloigné,

esloigné, qu'on sçache qu'on viole toute sorte de droits pour regner, *Si jus violandum regnandi causâ violandum est.*

Et puis la Loy du Christianisme contraint trop ces Messieurs-là, elle ordonne qu'on rende à Cesar ce qui est à Cesar, & à Dieu ce qui est à Dieu. Elle veut que l'iniustice ne trouue point d'excuse dans la necessité de se deffendre, bien loing d'en chercher dans l'ambition & dans les craintes imaginaires. Le Fondateur de cette Loy diuine n'a regné que par la douceur & par la Iustice, & s'est montré si obeïssant aux Loix diuines & humaines, qu'il a suby vne cruelle & honteuse mort sans murmurer. Le Mahumetisme est vne Loy bien plus propre à l'interest de ces barbares, laquelle ne s'est establie que par le sang & par le carnage, & qui loge toute sa gloire à contrecarrer les Institutions sacrées de IESVS-CHRIST, comme font ces malheureux.

Pour les Loix & Constitutions des bons Empereurs, elles ne sont pas encore du gibier de ces Messieurs-là. Ces Legislateurs estoient trop interessez dans leur dignité Souueraine, leur Politique & leur Morale n'est qu'un abstract de la Loy Chrestienne, il leur faut des Loix d'une autre trempe, & le fondement en fut-il jetté sur du sable, elles leur paroïssent assez fermes & assez justes, pourueu que le glaïue les soustienne & les autorise, & qu'elles soient cimentées du sang de leur Roy, & des plus grands & plus justes du Royaume.

Il y a quelque temps qu'ils mirent en deliberation d'exterminer toute la Noblesse. Car il faut que vous sçachiez, que l'armée Fairfacienne est composée de la plus sordide canaille, & pour ainsi dire, de l'escume de l'Angleterre. Ils n'ont pas mal commencé cette resolution, ayant mis à mort depuis peu trois Seigneurs de marque, le Marquis d'Hamilton, le Comte de Hollande & le Milord Capel, & banny & emprisonné plusieurs autres. Et pour exterminer ces Races illustres, ils emprisonnent les Dames de condition, comme ils ont fait depuis peu Madame la Comtesse de Carlile, Madame Isabelle Tin, Dames qui par leur beauté & par leur vertu sont plus capables de captiuer les hommes, que d'en estre captiues, si ce n'estoit que les Fairfaciens se sont despoüillez de toute sorte d'humanité. Ces soldats insolents s'allient bon-gré mal-gré aux

plus nobles & plus riches familles, & enleuent brutalement ces beautez Angloises, qui implorent vainement vostre secours ! ô Noblesse Chrestienne, & dont vne œillade fauorable recompenseroit avec vsure tous vos trauaux. Armez vous d'oc pour estouffer ces monstres, qui veulent faire perir tout ce qu'il y a de iuste & d'esclatant, & qui pourront bien frapper de cette contagion les autres Estats de l'Europe par leur malheureux exemple.

Finissons ces interests generaux, qui sont la pluspart fondez sur le mauuais exemple, en disant qu'il n'y a point de Nation plus capable d'infecter que les Anglois, parce qu'ils voyagent beaucoup, qu'ils sont d'un naturel accommodant à toutes les actions, qu'ils s'insinuent facilement dans les esprits, qu'ils apprennent bien-tost les langues, & enfin qu'ils sont grands Nauigateurs & grands Marchands, & qu'ils se fourrent dans tous les coins de la terre.

Venons maintenant aux interests particuliers de chaque Estat de l'Europe, & commençons par celui qui est commun dans la fin, quoy que different dans les moyens, à chaque Royaume ou Republique.

La jalousie de la Religion, & le desir qu'on a que tout le monde embrasse celle que l'on proteste, est vne passion qui entre aussi-tost dans nostre esprit que la Religion: ou par vn effet de l'amour propre qui nous oblige à persuader aux autres ce que nous croyons, ou de nostre charité qui nous porte à souhaiter le salut de nostre prochain. La Politique rencontre aussi de puissants interests dans l'vnité de Religion; parce que de mesme que dans la nature l'on voit les choses se destruire par leurs contraires, ainsi l'on a inferé que les Corps Politiques estoient sujets au mesme inconuenient, & que l'vnion & la bonne intelligence estant le Principe de leur vie, la diuision & la discord l'estoient infailliblement de leur corruptiō.

Ores l'vnion resalte ordinairement de la communauté des interests, & la diuision est vn effect de leur difference; tant plus les interests sont grands & sensibles, tant plus rendent-ils la liaison forte & indissoluble, de sorte que n'y ayant rien qui jette de si profondes racines, ny qui tienne si fortement dans les cœurs des hommes, comme les opinions touchant la

Diuinité, ny aucune affaire qui touche de si près que celle de leur salut; il s'ensuit necessairement que l'vnité de Religion est le plus ferme ciment, & le nœud le plus fort pour coller & lier les cœurs des sujets, & par consequent la piece la plus necessaire pour la conseruation du Corps Politique.

I E S V S - C H R I S T commande aussi qu'on aduance sa parole, qu'on presche & qu'on baptize, & sur tout qu'il n'y ait point de desunion dans son Eglise; & pour nous encourager à luy obeïr dans ces justes Commandements au peril de nos vies, il a monté le premier à l'assaut, & a voulu mourir sur vne Croix honteuse, afin de nous apprendre à mespriser la gloire aussi bien que la vie, pour establir la verité de l'Euangile.

Ie ne veux pas faire icy le controuersite, pour prouuer quelle est la meilleure Religion de celles que l'on professe dans le Christianisme, ie suppose que chacun croit estre dans le bon chemin, & a vne inclination puissante que sa Religion se rende vniuerselle, & dessein mesme d'y contribuer s'il luy estoit possible.

L'Angleterre ouure vn ample carriere à tous les Chrestiens de quelque Religion qu'ils puissent estre, & il semble que Dieu les inuitent à prester la planche à la Religion Chrestienne, qui est sur le point de faire naufrage. Car, quoy qu'il y ait plusieurs Chrestiens de differente espee en Angleterre, si est-ce que l'Esprit de Dieu ne pouuant resider parmy la confusion, parce que tout ce qui vient de ce Maistre ouurier est dans l'ordre & dans l'vniõ, il faut que la Religion perisse par cette contrarietè, de mesme que fit l'ouurage de Nembrot par la diuersitè des Langues dont, Dieu se seruit pour chastier sa temeritè.

Les Religions
les plus gene-
rales de l'Eu-
rope peuuent
esperer de s'e-
stablir en An-
gleterre.

Dans cette glorieuse entreprise d'establir la gloire de I E S V S - C H R I S T en Angleterre, & d'y affermir son Euangile, il faut s'armer d'vne charitè assez ardantè pour leuer toute sorte de jalousies & de partialitez, & ne point dire ie suis de Cephas & d'Apollo, mais de I E S V S Crucifié.

Ce n'est pas quesi (par les douces violences que la verité exerce sur les esprits qui la contemplent, & par le pouuoit que le bien a sur les cœurs qui le souhaitent, ie veux dire par les viues persuasions, & par le bon exemple.) chasque Reli-

gion pouuoit attirer l'Angleterre de son costé, ce ne fust vne chose très-loüable ; mais il ne faut pas vouloir recueillir la moisson deuant que d'auoir labouré & ensemencé la terre, il faut replanter l'arbre par la foughe, & non pas par les branches, & voir que la racine ait pris vie deuant que d'y enter des fruidts de differente espee. Il faut establir la Religion Chrestienne sur son fondement generale, & remettre I E S V S Crucifié sur les Autels deuant que de placer deux larrons à ses costez.

Il y a trois prix à remporter dans cette lice, le Maistre prix qui est commun & deux particuliers, le premier pour le retablissement de la Religion Chrestienne, le second pour la Foy Catholique, & le troisiéme pour la Religion de la pretenduë reforme, qu'il seroit bon mesme de reconcilier, si il estoit possible.

Cette raison est fondée sur ce que l'vnité de Religion est tres-necessaire à la felicité d'un Estat, & particulierement à l'Estat Monarchique, mais parce que l'experience nous a fait voir que sans vne grace particuliere de Dieu, il est comme impossible de reconcilier la Religion pretenduë reformée avec l'Eglise Catholique, si nous ne pouuons pas oster tout le mal, osters en du moins vne partie, & taschons de reduire toutes les Religions d'Angleterre à deux, la Religion Catholique, & la Religion pretenduë reformée.

Autrement ie puis dire qu'il est impossible que la Monarchie se reestablisce en Angleterre, parce qu'il faut que ce soit par le secours de l'Escoffe, ou par celuy de l'Irlande, & par ceux qui professent la Religion de l'un ou de l'autre parti en Angleterre.

Si la Religion Protestante ou Anglicane estoit la plus forte dans les Isles Britanniques, ie serois bien d'auis que la Monarchie se releuât sur ce fondement; mais l'experience nous a fait voir que cette Religion est incompatible avec la Religion Catholique, & avec celle de Geneue; & au contraire nous voyons que la Religion Catholique & celle de Geneue subsistent fort bien ensemble dans le Royaume de France, avec gloire pour la Monarchie, & tranquillité pour les Sujets.

La grande difference qu'il y a entre la Religion Catholique

lique & celle de Genève, fait qu'ils subsistent mieux ensemble, & cette ressemblance és choses exterieures qu'il y a entre l'Eglise Anglicane, & l'Eglise Catholique, engendre vne certaine jalousie qui ne se pourra iamais guerir; aussi l'Apostre nous commande-t'il de nous garder le plus des choses qui ressemblent au bien, ie puis joindre à cecy les persecutions qui ont esté exercées par les Protestants sur les Catholiques, tant en Irlande qu'en Angleterre; & les contestations qu'ils ont eues de tout temps avec les Calvinistes, & qui ont à la fin produit la guerre Civile, dont l'Angleterre s'est veu déchirée depuis huiët ans en ça.

C'est donc aux Ministres Anglois Protestants de prendre parti d'un costé ou d'autre, & de considerer ce qu'ils aiment mieux d'un benefice ou d'une femme, du Breuiere ou du Psaultier de Marot & de Beze, autrement ils se trouueront ferrez entre deux puissants ennemis, & comme on dit entre deux selles le cul à terre. De leur conseiller laquelle des deux Religions ils doiuent embrasser, ce n'est pas là le but de mon discours, c'est à eux à sonder leurs inclinations, & à iuger de la bonté de l'une ou de l'autre Religion; Je leur diray seulement qu'il y a de l'aduantage temporel de quelque costé qu'ils se tournent; car outre le secours qu'ils tireront de l'Irlande & de l'Ecosse estât Catholiques, les voila en communauté de Religion avec tous les Princes Catholiques, qui sans doute ne les abandonneront pas, s'ils embrassent la Religion de Genève. Ils auront aussi de leur party toutes les Eglises pretenduës reformées de l'Europe, qui se sont tousiours monstrees fort zelées pour leurs freres. Il y a d'autres interests politiques qu'ils peuuent rencontrer dans cette Communauté de Religion avec les Eglises de la pretenduë reforme; mais ie les laisse à deuiner, & dis seulement que le Roy d'Angleterre pourroit deuenir le Chef & Protecteur des Eglises pretenduës reformées de l'Europe, qui ne seroit pas vn titre peu aduantageux.

Conseil aux
Protestants
d'Angleterre.

Il est donc entre les mains des Ministres Anglois de restablir leur Roy dans son throsne, en leuant cette contrarieté & diuersité de Religions, qui comme le froid & le chaud produisent la foudre qui rauage l'Angleterre, qu'ils abbattent

donc les testes de cette Hydre qui les deuore, & qui s'allaité de leur sang, qu'ils considerent qu'ils n'eussent iamais esté malheureux, s'ils n'eussent iamais esté Protestants. Que la haine qu'ils ont attiré du Ciel sur leurs testes, en despoüillant l'Eglise qui auoit fleuri huit cens ans en Angleterre, & en persecutant les Catholiques, a esté cause de tous leurs malheurs, en produisant cette diuersité de Religions qui deschire les esprits, comme les guerres qui en procedent deschirent les corps, & les deschireront eternellement s'ils ne se reünissent, & ne se r'assemblent tous comme des poussins esgarez sous les aisles de la poule.

Qu'ils considerent que l'vnion de la Souueraineté spirituelle, & de la temporelle dans vn mesme Chef, a causé la ruine de la Monarchie en Angleterre; parce que l'une tombant elle entraïne necessairement l'autre dans sa ruine, & que l'on ne scauroit choquer le Roy sans choquer le Chef dans les choses spirituelles, ny ce Chef spirituel sans esbranler la Monarchie. Et le malheur est, que le Roy ne scauroit tesmoigner de zele pour la Religion qu'on ne le soupçonne d'interest particulier, parce qu'il en est le Chef, & le Chef de la Religion ne scauroit rien entreprendre pour le bien de la Monarchie, parce qu'il est Roy, & que son interest le demande ainsi.

Il n'en est pas de mesme chez les Princes Catholiques, où la puissance temporelle est destachée de la spirituelle, ce qui est très-aduantageux, tant aux Princes qu'au Chef de l'Eglise; car le Prince soustient par la force du bras Seculier l'autorité Ecclesiastique, & le Saint Pere par le pouuoir qui luy est donné sur les ames, les intimide de ses Anathemes & de ses menaces, les exhorte comme Pere commun, & destourne par ces puissants moyens les mauuais desseins que les sujets auroient contre leur Souuerain, sans qu'il paroisse qu'il agisse pour son interest, non plus que la deffence que les Roys donnent au Saint Pere, peut estre tenue pour suspecte à leurs sujets.

Bref l'experience nous a fait voir trop déplorablement que leur Religion n'est pas propre pour la Monarchie, puis qu'elle ne l'a pû soustenir, & qu'elle ne s'est pû soustenir

elle mesme, & puis ils aduoient eux mesmes qu'ils sont vn membre de l'Eglise Catholique, & qu'ils n'en different qu'en de petites circonstances qui ne sont pas, disent-ils, necessaires à Salut. Pourquoy donc veulent ils laisser perir leur Monarchie, & se ruiner eux mesmes pour vne petite difference qu'ils trouuent si peu importante à Salut?

Et de grace, par quel priuilege particulier ne seront-ils pas sujets au Saint Siege? car accordons leur que les Eglises de l'Orient se soient distinguées legitiment de celle de Rome, à cause de la distance des lieux, & que les Chrestiens ayent iugé à propos de diuiser l'Eglise en plusieurs Patriarchats, si est-ce que toute Eglise Chrestienne doit estre sujette à vn Patriarche. Et de quel Patriarche doiuent releuer les Anglois, sinon de celuy de Rome, comme estant le plus proche? Ils y ont esté sujets vn long-temps. Et pourquoy n'ont-ils pas continué aussibien que les François, les Espagnols, les Italiens & autres? C'est vn tres-mauuais exemple qu'ils ont donné aux esprits rebelles & ambitieux, & ie puis dire qu'ils ont monstre le chemin aux destructeurs de leur Monarchie; car si l'on peut secoüier l'obeissance qu'on a renduë huiet ou neuf siecles entiers à vne Puissance establie de Dieu particulièrement, veu qu'il se dit le Chef & l'Espoux de son Eglise, ne pourra-t'on pas secoüier la Monarchie? Et de fait, la Monarchie n'a commencé d'estre attaquée en Angleterre, que depuis que les Protestants ont attaqué l'Eglise.

Que les Ministres Anglois deuiennent donc sages apres leur faute, quoy que ce soit vn peu tard, que les effects leur fassent detester la cause, qu'ils prennent parti d'un costé ou d'autre, & puis qu'il n'est pas possible de reconcilier toutes les Religions Chrestiennes, qu'ils les reduisent à deux comme à fait la France avec succez & avec gloire, par ce moyen ils feront des amis de costé & d'autre qui s'employeront à leur reestablissement, autrement s'ils demeurent tousiours sur leur quant à moy, & fassent Religion à part, ils seront tousiours estimez heretiques des Catholiques & des Huguenots, ils leur donneront continuellement de la jalousie & des soupçons, & il arriuera qu'en se voulant opiniastrer pour des choses qu'ils confessent eux mesme estre

indifferentes, ils se ruineront eux-mesme, & n'auront point de part à la gloire du reſtaſſement de leur Monarchie. Car les Catholiques ne ſçauoient oublier les peſecutions que leur ont fait ſouffrir les Proteſtants: Et les Puritains ſe ſouuiennent encore de la Liturgie qu'on leur enuoya en Eſcoſſe, & de la contrainte qu'on voulut apporter à leurs conſciences.

Mais pour finir par où nous auons cōmencée Motif, fondé ſur le zele que les Catholiques & les Huguenots doiuent auoir pour l'eſtaſſement de leur Religiō dans les Iſles Britanniques, ie diray qu'ils y doiuent proceder ſans jalouſie, & ſans ambition, mais ſeulement eſtudier les eſprits des Anglois qui ne ſont ny Catholiques ny Huguenots, & les obliger de ſe réger ſous l'un ou ſous l'autre eſtendart, cōme l'on fait en France, ſans violenter ny les Catholique ny les Huguenots, mais ſeulement ceux qui voudront faire bande à part, & nourrir cette monſtrueuſe conſuſion d'opinions & de Sectes, qui a rendu & rendra l'Angleterre, comme toute autre Monarchie malheureuſe. Les Huguenots ſçauent mieux que ie ne leur ſçauoient dire, l'intereſt politique qui les oblige de s'vnir à vne partie des Iſles Britanniques. Les Papes ſçauent auſſi que le denier de Saint Pierre qu'ils cueilloient en Angleterre eſtoit vn de leurs meilleurs reuenus, mais c'eſt expoſer toute la gloire de ce deſſein, que d'y meſſer les intereſts temporels, & de confondre le ſacré avec le prophane.

Après l'intereſt de la Religion, paſſons à celui de l'honneur, & faiſons voir que les Princes & autres Eſtats de l'Europe ſont obligez en honneur de reſtaſſir la Couronne d'Angleterre.

Ie confeſſerois avec beaucoup d'autres, que l'honneur eſt vn tres-foible reſſort dans la Politique, qui ne s'attache qu'aux effets ſolides des actions, & non pas à ce vain eſclat qui en rejallit, ſi ce n'eſtoit que l'impunité du crime eſpouuentable exercé en la perſonne du Roy d'Angleterre, ſeroit de tres-mauuaſe conſequence, & que les peuples commencent en pluſieurs endroits à ſe relascher de la crainte & veneration qu'ils doiuent auoir pour leurs Souuerains.

Par cette juſte vengeance les Puiffances de l'Europe effaceront

teront trois vilaines taches, qui menacent desia leur honneur; qui sont, la lascheté, l'ingratitude, & la calomnie. Commençons par la lascheté.

Il n'est pas moins important qu'honorable aux Puissances de l'Europe, de prendre à cœur les affaires du Roy de la grãde Bretagne, de se porter avec courage à son reſtabliſſement, & deſtruire les Bourreaux, qui ont trempé leurs mains ſacrileges dans ce ſang Royal & innocent.

Et quoy que leur procedé ſeroit criminel dans la perſonne meſme d'un tyran, il ne ſera pas néanmoins hors de propos de faire voir que le Roy d'Angleterre n'auoit aucune tache d'injuſtice ou de tyrannie, & que les Anglois rebelles ne peuuent colorer leurs meſchantes actions du moindre pre-texte que ce ſoit, & au contraire qu'ils ſont coupables de tous les crimes que la malice & la barbarie peuuent inspirer en des ames ſordides & enragées. Mais deuant que d'entrer en cette matiere, diſons deux mots du gouuernement d'Angleterre.

Le Roy d'Angleterre eſt le plus abſolu Prince de l'Europe, ne ſeul, tant dans le ſpirituel que dans le temporel. Il eſt bien vray que de temps en temps il conuoque des Eſtats généraux qu'ils appellent Parlement; Mais c'eſt quand il luy plaist, de meſme qu'il les diſſoud lors qu'il le trouue à propos. Cette conuocation d'Eſtats a eſté eſtablie par des Roys ambitieux & auides du ſang de leur peuple, & artificieux tout enſemble. Parce que c'eſtoit vn moyen d'opprimer ſes Sujets, ſans eſtre chargé de leurs plaintes ny perdre leurs affections. S'ils vouloient leuer de grandes ſommes de deniers ils aſſembloient les Eſtats, qui eſtoiſſent tout le monde; & parce qu'ils repreſentoient tout le Royaume, & eſtoient eſleus des plus illuſtres de chaſque Prouince, l'on ſe ſoumettoit ſans murmurer à leurs decrets, d'où il eſt arriué que les peuples ont ſouuent prié les Roys de ne point conuoquer de Parlements.

Le Roy deſunet qui cheriſſoit ſes ſuiets avec vne tendreſſe paternelle, eut encore vn autre ſuiet de ne pas conuoquer ſi ſouuent des Parlements, c'eſt qu'il auoit aperçeu que les eſprits turbulents qui ſ'y rencontroient, ſoit qu'ils preme-

Les Anglois ac-
cuſent leur Roy
de n'auoir point
conuoqué ſou-
uent le Parle-
ment.

ditassent desia sa ruine, ou qu'ils voulussent brouiller les choses pour en profiter, ils l'engageoient tousiours en des guerres mal fondées pour le perdre de reputation, pour le rendre odieux à ses peuples, & le destacher des alliances des autres Prouinces de l'Europe, ce qui paroist clairement dans les guerres qu'ils luy firent entreprendre contre l'Espagne & contre la France, où ils l'abandonnerent si-tost qu'elles furent declarées.

On accuse le
Roy d'Angle-
terre d'auoir
violente les
Escossois dans
leur Religion.

Neanmoins le Roy ne tira point d'autre vëgence de ses artifices, sinon de donner la paix à ses peuples en la faisant avec la France & avec l'Espagne, & en protestât de ne l'interrompre iamais pour quelque interest que ce fust; Mais ces esprits turbulents ne pouuoient pas demeurer sans rien faire, l'abondance & la tranquillité de l'Angleterre les choquoit, ils pratiquent sous-main les Escossois, j'entends les mal affectonnez à la Monarchie, & par vn artifice prophane, font tant qu'ils leur donnent vn pretexte d'armer: Les Estats d'Escoffe enuoyent en Angleterre, proposent au Roy de conformer entierement leur Religion à celle de l'Angleterre, & pour cet effect prient l'Archeuesque de Cantorbery de leur enuoyer la Liturgie Anglicane, qui sont les prieres qui se recitent dans les Eglises. On est rauy de cette vnion, on leur enuoye la Liturgie, les principaux conspirateurs s'en seruent comme d'une teste de Meduse pour allarmer le peuple & les Ministres. Ils font brusler ce liure, ils chassent les Euesques, ils leuent des troupes, & entrent à main armée en Angleterre.

Les Anglois ac-
cusent le Roy
d'Angleterre
d'auoir esté au-
teur de leurs
guerres.

Les Anglois de leur Religion, ou pour mieux dire de leur conspiration, dissimulent encore pour quelque temps. Le Roy conuoque les Estats pour leur demander de l'argent afin de mettre vne armée sur pied pour repousser les Escossois. Mais comme le party ennemy du Roy preualoit dans le Parlement, l'intelligence entre-eux, & l'Escoffe esclata aussi-tost, Le Roy ne laisse pas de leuer vne armée; Mais le Parlement l'ayant remplie d'Officiers à sa deuotion, & ne fournissant point d'argent pour la souldoyer, le Roy fust contraint de passer par tout où il leur pleust, de façon que les Conspirateurs ayant deux armées sur pied, l'une Angloise &

l'autre Escossoise, ils commencerent à tout renuerfer dans l'Estat & dans la Religion, le Roy remet d'abord quelques legers impôts qu'il auoit establis pour l'entretien de la flotte, qui sont les seules fortresses & places de garnison qui gardent l'Angleterre. Et pour éuiter les malheurs qu'il preuoyoit, il se resout de ne point esleuer de digue contre ce torrent, & de leur accorder tout ce qui seroit arresté dans le Parlement par la pluralité des voix.


Mais la liberté des suffrages fust aussi-tost rauie par les clameurs & violences de la Populace, que les Conspirateurs instruisoient & sousleuoient sous-main. Les honnestes gens sont contrainsts d'acquiescer, ou de se retirer comme plusieurs firent. L'on demande au Roy la teste de son premier Ministre le Milord Strasford, il leur accorde; L'emprisonnement de l'Archeuesque de Cantorbery qu'ils ont depuis mis a mort, il leur accorde. Ils bannissent, ils emprisonnent plusieurs autres personnes de condition, abolissent la dignité Episcopale, persecurent cruellement les Catholiques, destruisent la Religion Anglicane, se saisissent des vaisseaux de guerre, des fortes places & des Arsenaux, le Roy souffre tout cela pour destournervne guerre ciuile. Mais les Conspirateurs la veulent à quelque prix que ce soit, croyant que leur pouuoir ne scauroit estre bien affermy si ce n'est par les armes & par le sang. Ils demandent donc au Roy quantité de choses qui luy estoit comme impossible d'accorder, comme d'assembler vn Parlement de trois ans en trois ans, qui aura tout pouuoir, & qui ne se pourra dissoudre sans le consentement du Parlement mesme, qui est proprement establi des Estats perpetuels, & s'arroger le pouuoir Souuerain, le Roy leur accorde cela. Ce n'est pas assez, ils en veulent à sa vie & à celle de la Reyne, leur Palais est tous les iours assiegé d'une canaille sousleuée que les Conspirateurs instruisent & encouragent; Enfin le Roy est contrainst de quitter Londres, & se retirer aux parties Septentrionales les plus reculées de l'Angleterre avec moins de cent hommes à sa suite, & sans aucune assistance que celle de la Prouidence Diuine.

Les Conspirateurs declarent contre le Roy, ils arment, & declarent traistres tous ceux qui luy donneront assistance, le

Roy voyant qu'à ce mal violent, il falloit de violents reme-
des, leue des troupes & vient à la rencontre des Conspira-
teurs, où l'on donne bataille, sans decider neantmoins le dif-
ferent; voila comme la paille se rompit, & comme la guer-
re fust allumée. Je ne m'amuseray point à en deduire toutes
les circonstances, cela n'est pas de mon suiet, elle a duré
sept ou huit ans, où il s'est donné plus de batailles que fait
de sieges, parce qu'il y a peu de fortes places en Angleterre.

Pour faire court, les rebelles eurent du bon, mais crai-
gnant que la personne du Roy leur eschapaist, ils recoururent
encore vne fois à l'artifice par le moyen des Escossois Con-
spirateurs, qui firent semblant de tourner casaque. Ils se
declarent pour le Roy, l'inuitent de se retirer en Escosse, &
luy jurent de perir pour r'establir ses affaires. Le Roy fut si
mal conseillé que de les croire, il se trauestit, & luy second se
rend dans l'armée Escossoise, qui tenoit le siege deuant vne
petite ville qui luy estoit fidelle, les Escossois recoiuent le
Roy avec beaucoup de respect & de ioye, le siege se leue,
& l'armée Escossoise & le Roy se retirent vers la frontiere
d'Escosse.

Les Anglois promettent aux Escossois de restablir le Roy,
s'ils le veulent remettre entre leurs mains. Les Escossois de-
mandent que premierement il leur soit payé deux cent mille
Iacobus, qui leur sont deus pour les frais de la guerre qu'ils
ont entreprife pour l'Angleterre; cela leur est accordé, & le
Roy est remis entre les mains des Anglois. Fairfax General de
l'armée Angloise eut ordre du Parlement de bien veiller
sur sa personne, sans pourtant vser de contrainte. Et ce per-
fide qui meditoit desia son dessein execrable, traittoit
le Roy avec toute sorte de respects & de deferences, le Par-
lement en prend jalousie, luy commande d'amener le Roy
à Londres & de desarmer. Il se mocque de leur ordre, &
propose au Roy de le restablir, s'il veut seulement le laisser
faire. Mais parce que le procedé de Fairfax se verra plus
clairement dans cette declaration d'un Officier Puritain de
l'armée Angloise, qui detestant l'infidelité de Fairfax, ayma
mieux abandonner ses interets, que de trahir sa conscience,
en prestant la main à vne menée si detestable, ie l'ay voulu
inferer icy, l'ayant traduite fidelement de l'Anglois. Les



LES RAISONS QVI ONT OBLIGE' LE
Major Robert Huntington de quitter le seruice de Fair-
fax, présentées aux tres-honorables Chambres du Parle-
ment, imprimé à l'Ondres mil six cent quarante-huiët.

A Tant pris les armes pour la deffence de l'autorité, & priuileges du
du Parlement, sous le commandement du Milord Grey of Warke,
& du Comte de Manchester, en qualité de Major du regiment du Lieu-
tenant General Cromwell, dans lequel seruice ie me suis comporté en
homme d'honneur; & ayant depuis peu quitté le seruice, j'ay crû estre obligé
d'en donner mes raisons, qui sont en general, Que les principes, desseins &
actions des principaux Officiers de l'armée, sont du tout contraires à l'an-
thorité du Roy, aux Priuileges du Parlement, & à la Religion.

Premierement ils refuserent de poser les armes, selon les ordres du Parle-
ment, & se saisirent de la personne du Roy à Holdenby, & le Cornet Ioyce le
conduisit à Newmarket, où le Lieutenant General Cromwell commença
de faire la Cour au Roy, & luy dire qu'il luy seroit bien plus glorieux, d'estre
restably par l'armée, que par le Parlement, & quand le Roy repliqua au
Lieutenant General Cromwell (comme il a fait plusieurs fois) qu'ils n'e-
stoient soldats que par le pouuoir du Parlement, il fit responce qu'il vouloit
changer de Maistre, & nommer doresnauant son armée l'armée Royaliste.
Vn peu apres le Parlement enuoya prier le Roy de s'approcher de Londres
& de venir à Richemond. Mais nous eusmes ordre de l'en empescher, &
d'observer de près les Deputés du Parlement. Le Roy estant à Cauersham, le
Commisnaire General Ireton luy fit de tres-belles offres, & presque tout ce qui
pouuoit souhaitter, pourueu qu'il les laissast faire. Cependant l'armée dressa
des articles qu'elle presenta au Roy, mais il ne les voulut pas signer, parce
qu'elles estoient fort preiudiciables au Parlement, & qu'il n'en estoit pas tom-
bé d'accord, surquoy Fairfax aduança ses troupes vers Londres, pour forcer
le Parlement à consentir. Et le Roy entendant cela, me fit appeller & me com-
manda en ces propres termes. Allez dire au General, & au Lieutenant
General, que pour destourner vne nouuelle guerre, ie m'accorderay à
tout, moyennant que mon honneur & ma conscience n'y soient pas en-
gagés. Mais l'armée ne cherchoit point d'accommodement, & le Roy estant à
Stoke me dit, qu'il auoit grand peur que le Parlement n'en vint aux mains.
Cependant ils faisoient tousiours dire au Roy qu'il ne se mit point en peine,
& qu'ils le rendroient le plus glorieux Prince du monde. Mais qu'il falloit
auparauant si bien purger & repurger le Parlement, qu'il vuidast toutes ses
mauuaïses humeurs, dans le dessein qu'ils prirent de marcher vers Londres,
craignant que la Personne du Roy leur eschapast à Hamptoncourt, ils l'en-
uoyerent dans l'Isle de Wiglit, luy disant que sa personne n'estoit pas là en
seureté, & que quand ils auroient réduit Londres, ils l'y rameneroient triom-

phant. Pour cét effect ils firent filer toute leur armée à trauers Londres, & bannirent onze membres des plus zelex du Parlement, accusèrent de trahison sept Seigneurs, & emprisonnerent quatre Escheuins, & plusieurs autres Bourgeois des principaux, & en firent mourir quelques-uns.

Ayant obserué la conduite de ces Messieurs là vn an durant, & voyant qu'elle ne tendoit qu'à la ruine du Roy, du Parlement & de la Religion, esperant toutesfois que la chance pourroit tourner, ie balancé à me retirer, mais enfin ie me résolus de quitter mon employ, où j'auois seruy l'espace de cinq ans, aimant mieux me hazarder en la descouuerte de ces veritez, que sous l'espoir de quelque profit, trahir ma conscience & presser mon bras & consentement à de si pernicleux desseins. En quoy Dieu m'a bien assisté, puis qu'ils en sont venus à des extremitéz si extraordinaires, que de chasser deux cens membres du Parlement, & y mettre des gens de l'armée faits à leur badinage, qui autorisassent toutes leurs mauuaises actions.

Cette seule infidelité n'est-elle pas digne de punition, quand mesme ce malheureux n'auroit pas trempé ses mains dans le sang de son Roy? Sa tyrannie & son vsurpation n'est point dans les regles de la Conqueste, il est suiet du Roy d'Angleterre & simple gentil-homme, qui ne pretend & ne peut pretendre aucun droit à la Couronne; il estoit à la solde du Parlement, dont il s'est rendu le maistre, de façon qu'il n'a pas seulement foulé aux pieds le Sceptre & la Religion, mais encore la Iustice, & Themis n'est pas moins obligée de prester son espée pour destruire cét impie, ce rebelle & ce violateur de Loix, que Iupiter ses foudres pour l'escraser.

Mais parce que les Politiques sont d'ordinaire peu sensibles aux maux de leurs voisins, voyez comme il attaque la Monarchie & toutes les puissances Souueraines, dans vn arrest qu'il a fait donner depuis la mort du Roy, dans sa nouvelle Cour de Iustice qu'il a composée de gens de sa sorte, pour seruir d'instrumentz à ses detestables actions. Je l'ay fait traduire de l'Anglois mot pour mot.

ARREST POVR L'ABOLITION DE LA DIGNITE

Royale en Angleterre & en Irlande, & les pays qui en releuent.

Comme ainsi soit que Charles Stuart cy-deuant Roy d'Angleterre, d'Irlande & des pays qui en releuent, ait esté par l'autorité du Parlement, & soit par icelle déclaré iustement digne de mort, & condamné d'estre mis à mort pour diuerses trahisons, meurtres, & autres crimes enormes, commis par luy, par lequel iugement il a esté & est déclaré atteint de haute trahison, par où ses enfans & autres hoirs, & generallyment tous ceux qui pretendent titre sous luy, sont deuenus inhabiles de porter les deux Couronnes, & d'estre Roy ou Reyne de l'un ou de ces deux Royaumes & pays. Qu'il soit donc arresté & ordonné, comme il est arresté, déclaré & ordonné par ce present Parlement, & par l'autorité d'iceluy, que tous les Peuples d'Angleterre & d'Irlande, & des pays & territoires qui en releuent, de quelque qualité ou condition que ce soit, sont deschargez de la fidelité, hommage, & allegiance, qui est ou sera pretendüe estre deuë à aucun des enfans & hoirs dudit dernier Roy, ou aucun autre se preualant de son autorité, & que Charles Stuart fils aîné; Iacques nommé Duc d'York second fils, & tous autres enfans & hoirs dudit dernier Roy, & toutes personnes pretendantes titre de luy, par luy, & sous luy, sont rendus inhabiles de porter lesdites Couronnes d'Angleterre & d'Irlande, & des autres territoires qui en releuent, ou auoir le nom, le stile, & la dignité de Roy ou de Reyne d'Angleterre & d'Irlande, Prince de Galles & autres, ou d'auoir & jouir du pouuoir & territoires desdits Royaumes, ou d'aucun d'iceux, ou les honneurs, demeures, terres, possessions, heritages appartenants ausdits Royaumes & pays, ny à la Principauté de Galles, Duché de Lancaster, ou de Cornwall; Nonobstant aucune Loy, Statut, Ordonnance, usage ou coustume contraire en quelque façon que ce soit à ce present Arrest. Et comme ainsi soit que l'on trouue, & que l'on a trouué par experience, que l'Office de Roy dans ces Royaumes d'Angleterre, & que le pouuoir d'iceux soit dans une seule personne, est une chose qui n'est pas necessaire, au contraire onereuse & dangereuse à la liberté, seurété, & interest public du peuple, & que le plus souuent on s'est serui du pouuoir & des prerogatiues Royales, & opprimer, appauurir, & rendre esclaves les sujets, & d'ordinaire, & naturellement toute personne establie dans ce pouuoir, fait son interest d'empieter sur la franchise & liberté du peuple, & pour aduancer l'establissement de leur propre & simple volonité & pouuoir au dessus des Loix, afin qu'ils puissent rendre esclaves ces Royaumes selon leur plaisir. Partant qu'il soit arresté & ordonné par ce present Parlement, & par l'autorité d'iceluy, que la charge de Roy dans cette Nation ne residera point dorefnauant, & ne sera point exercée par une seule personne, & que quelque personne que ce soit n'aura & ne peut auoir ny tenir l'Office, stile, dignité, pouuoir ou autorité de Roy desdits Royaumes & territoires ou d'aucun d'iceux, ny la qualité de

Prince de Galles, nonobstant aucune Loy, Statut, usage ou coustume contraire en cela en quelque façon que ce soit. Et il est partant arresté que si aucune personne se met en deuoir d'attenter par force d'armes ou autrement, ou en aidant, assistant, confortant aucune personne, qui par aucune voye ou moyens que ce soit s'efforceront & attenteront de renouueller & remettre dessus aucun droit pretendu par ledit Charles fils aîné dudit dernier Roy, par Iacques nommé Duc d'York, ou par aucuns autres hoirs dudit dernier Roy, ou par aucunes autres personnes s'appuyant de leur autorité, à la charge de Roy, stîle, dignité, & autorité, ou d'estre Prince de Galles, ou d'auancer vne seule personne qui que puisse estre au nom, stîle, dignité, pouuoir, prerogatiue, & autorité de Roy d'Angleterre & d'Irlande, & autres pays qui en releuent, & que la contrauention à ce present Arrest sera reputée haute trahison, & que ceux qui en seront atteints, qui le conseilleront & espauleront seront reputez traistres enuers le Parlement & le peuple d'Angleterre, & seront suppliciez & leurs biens confisquezz, & enfin traitez en personnes conuaincues de crime de haute trahison.

Et comme ainsi soit que par l'abolition de l'Office de Roy, par ce present Arrest, vn heureux moyen est donné à cette Nation (si Dieu le trouue bon) de retourner à son juste & ancien droit, & estre gouvernée par vn Corps representant toutle Royaume, & des assemblées nationales conuouquées de temps en temps, dont les membres seront choisis & esleus par le peuple à cét effect. Parant il est resolu & déclaré par les Communes Assemblées en Parlement, qu'ils finiront & dissoudront ce present Parlement aussi-tost que faire se pourra, pour la seureté du peuple qui s'est reposé sur luy. Et pour ce qui est absolument nécessaire pour la preservation, & soustien du gouvernement nouuellement establi en forme de Republique, & qu'ils pouruoiront soigneusement à vn choix assuré, pour la conuocation & seance du premier Corps representatif qui se fera, avec les autres circonstances de liberté dans le choix, & égalité en la distribution des membres qui y doiuent estre esleus, comme il sera plus conuenable à la conseruation de la franchise & prosperité de cette Republique. En outre il est arresté & déclaré, nonobstant aucune chose contenüe en cét Arrest, que toute personne de quelque qualité ou condition que ce soit, dans cette Republique d'Angleterre & d'Irlande, Principauté de Galles, Isles de Guernsay & Iersey & de la ville de Berwick sur la riuiere Tweed, sera deschargée de l'obeissance & subjection qu'elle doit au gouvernement de cette Nation, comme il est maintenant déclaré, mais chacun s'y soumettra en toutes choses, & se comportera ainsi qu'il est deu à l'autorité Souueraine, qui est déclarée par cét Arrest resider dans ce Corps representatif du peuple de cette Nation, & dans celuy qui luy succedera, & en eux seulement.

Die Sabbathi 17. Martij 1649.

Ordonné par les Communes assemblées en Parlement, que cét Arrest sera imprimé & publié.

Imprimé à Londres chez EDOUARD HVSBAVD, Imprimeur de la Chambre des Communes.

Les puissances Souueraines furent-elles iamais plus blessées dans leur honneur & dans leur interest? Et souffriront-elles qu'un soldat de fortune traite de la sorte leur dignité, qu'elles seroient mesme obligées de defendre, quand ce ne seroit que parce qu'elle est le Caractere de Dieu, & l'Image viuante de sa puissance Souueraine?

Ensuite de cét Arrest, Fairfax fit trencher la teste à trois des plus grands Seigneurs d'Angleterre & d'Escoffe, pour auoir esté fideles à leur Roy, au Marquis d'Hamilton, au Comte de Holland & au Milord Capel.

Pour l'Eglise, nous auons fait voir comme elle est prophannée par les sacrileges & impietez de ce barbare, & ie puis dire qu'elle n'est pas la moins interessée dans cette querelle. Iamais elle n'ouurit si à propos le thresor de ses graces & de ses prieres, & iamais ses reuenus ne se pourront mieux employer qu'en cette occasiō, où le Christianisme est sur le point de faire naufrage, dans vn lieu que l'on nommoit autrefois le Paradis de l'Eglise, & dont les Roys ont merité par leur valeur & par leur pieté, le titre glorieux des Deffenseurs de la Foy.

Le tiers Estat n'est pas moins interessé dans cette querelle que les autres, à cause de l'estroite alliance & vnion qu'il y a entre les sujets & le Souuerain, plus grande mesme que celle du pere avec les enfans, mais pareille à celle de la teste avec les membres; le chef abbatu il faut que le corps tombe. La raison de cette consequence est, qu'un vsurpateur est dans des soupçons & des craintes continuelles, ce qui l'oblige à tenir tousiours des armées sur pied, & à gouverner par la rigueur, puis qu'il ne scauroit attendre de l'amour, en ruinant les peuples par les troupes qu'il n'entretient pas pour le bien public; mais pour sa conuersation particuliere.

L'honneur se ternit encore par l'ingratitude, & d'autant plus vilainement, que les personnes qui la commettent sont moins capables de ne le pas faire.

Autre motif
d'honneur pris
de l'ingratitude.

Il y a peu de Monarchies & d'Estats dans l'Europe, qui n'ayent de tres-grandes obligations à la Couronne d'Angleterre; mais des obligations semblables à celle qu'elle attend maintenant d'eux. Le Sang de Bourbon luy en a de tres-grandes, puis qu'elle a contribué à la conqueste du Sceptre

Les obligations
que la France a
à la Couronne
d'Angleterre.

qu'il porte; Personne n'ignore combien il fut disputé à Henry IV. & quels importans secours la Reyne Elizabeth luy presta. Et si l'establissement de ce Prince est le fondement de la gloire du Sang de Bourbon & du bon-heur de la France, ne serions-nous pas tachez d'une ingratitude inexcusable, de laisser perir ceux qui nous ont allaité dans le berceau, lors que nous sommes paruenus en âge de vigueur & de force? De refuser vn Esquif à ceux qui ont contribué au bastiment de nostre Vaisseau? & abandonner à l'orage ceux qui nous ont poussé dans le Port?

La mesme Reyne secourut aussi puissamment les Hollandois, comme nous dirons cy-apres, dans la naissance de leur establissement, d'où la France a tiré de très-puissans avantages, puisque c'est-là, où ont commencé à eschoüer les progresz ambitieux de la Maison d'Autriche. Cette espine que la Reyne Elizabeth luy enfonça dans le pied, l'arresta tout court, & luy a tant donné d'exercice du depuis, que la Monarchie Françoisise a eü le temps & les occasions de se rendre florissante, iusques-là mesme, que de donner de la jalousie à ceux qui y auoient contribué le plus.

De descendre aux derniers temps, ce seroit vne chose inutile, tout le monde ayant la memoire recente des diuerfes marques d'affection, que les derniers Roys d'Angleterre ont donné à cette Couronne. Le Roy Iacques en les assistant, comme la Reyne Elizabeth, & le feu Roy en espousant vne fille de France, & en donnant vne de ses filles au Prince d'Orange allié plus particulierement à la France. Nous deuons aussi considerer que ce Prince pouuant profiter de nos guerres entre nous & l'Espagne, & que mesme estant comme de son interest de prendre jalousie de nos victoires en Flandres, pour les mesmes raisons que les Hollandois, qui ne veulent point vn voisin si puissant & si belliqueux comme la France, neantmoins ce Prince a tousiours demeuré dans les bornes d'une parfaite neutralité. Nous pouuons adjoüster à cela que la Reyne & le Roy d'apresent, ayant choisi la France pour leur azile, luy ont tesmoigné que la Couronne d'Angleterre a vne inclination particuliere, d'ynir ses interests à ceux de la France.

Quelle

Quelle honte & quelle ingratitude y auroit-il pour la France, de laisser tomber l'Ecosse sous la tyrannie d'une troupe de Scelerats & de Tyrans? L'Ecosse qui a une alliance si estroite & si ancienne avec la France, & qui a mérité d'elle par tant de signalez services, les mesmes droits & priuileges que les François naturels: Souffrirons-nous que ceux qui seruent à la garde de la Personne de nos Roys, soient vendus pour esclaves, comme ils ont esté à Londres apres leur deffaitte l'Esté passé? Auons-nous oublié que l'Ecosse a plus d'une fois sauué la France? & laisserons-nous tomber dans la seruitude ceux qui nous ont plusieurs fois deliurez?

Que la France
doit sauuer l'E-
cosse de la ty-
rannie Fairfa-
xienae.

Souffrirons-nous que le Marquis d'Hamilton leur General ait esté impunément mis à mort? & que les troupes de Fairfax ayent estably leur tyrannie dans l'Ecosse, en intimidant les honnestes gens, espaulant les rebelles, & leur mettât en main les armes & l'autorité publique, dont ils se seruent à l'exemple de Fairfax, ayant fait mourir depuis peu par la main d'un Bourreau le Marquis de Huntley, pour auoir esté fidele à son Roy. Si ces malheureux n'auoient pas autant de mespris pour les autres Monarques, que pour les leurs, n'auroient-ils pas du moins espagné ce Marquis, pour cette seule consideration, qu'il possedoit aupres des Roys de France, la charge de Lieutenant des Gardes de la Manche Escossois? Ils font bien voir par-là que leur auersion est generale, & qu'ils ne manquent que de pouuoir pour renuerser ailleurs, l'ordre que Dieu a estably pour le repos & le gouuernement des hommes, & prophaner les Autels que les Chrestiens ont esleuez à sa gloire. Ce qui paroist assez par les efforts qu'ils ont faits durant nos troubles Parisiennes, de faire entendre aux peuples qu'ils les secoureroient d'hommes, de vaisseaux & d'argent. Et ie sçay de bonne part, qu'ils l'ont fait offrir sous-main, au grand scandale, & detestation de la Cour de Parlement. Et pour moy ie veux croire qu'ils ont aduancé la mort de leur Roy, croyant effacer par là des cœurs des François, le respect & la veneration qu'ils ont pour leurs Souuerains, pour intimider le party du Roy, & pour encourager les peuples, & les engager par cét exemple sacrilege & barbare à la rebellion; & mesme il s'est rencontré

d'assez meschans esprits pour tirer des consequences de l'insolence & de la barbarie des Anglois, en des termes capables d'animer vne Populace desia alterée & aigrie par l'abstinence & par les veilles.

Que les Princes Chrestiens doivent secourir les Hibernois.

Eloge des Hibernois.

L'Irlande d'où nous tirons tant de bons soldats aussi-bien que de l'Escoffe, sera-t'elle aussi immolée à la rage de ses ennemis? Et les Autels que leur pieté ancienne y vient de releuer, ne seruiron-ils que pour appendre les trophées que ces impies esleuent à l'idole du Demon qui les possède? Le ne me sçaurois empescher en cét endroit de donner quelques eloges à la nation Hibernoise; Et si ie ne craignois leur oster vne partie de l'honneur qu'ils meritent, ie dirois que Dieu, qui de tout temps a enrichi son Eglise d'ornemens precieux, & d'un esclat capable d'attirer & d'illuminer les esprits des hommes, a voulu la rendre illustre en cette occasion par la fidelité inuiolable des Hibernois, qui, apres vne sanglante guerre ciuile de huit ans, au lieu de goustier les douceurs de la paix, semblent ne l'auoir faite, que pour se porter à la vengeance du meurtre de leur Prince, & à restablir sa Couronne dans la personne du Roy d'apresent son successeur. Ils preferent vne glorieuse ruine, (si Dieu l'a ainsi determiné) à vne tranquillité honteuse; ils suiuent vn Roy despoüillé, & fuyent vn vsurpateur triomphant qui les inuite par les amorces de la liberté; ils preferent leur conscience à leur interest, l'honneur aux richesses, & la mort à vne vie qui seroit criminelle par leur lascheté. Ils ne se contentent pas de payer le tribut à Cesar, mais ils y veulent contraindre les autres; Et quoy que leur Roy soit d'une croyance contraire à la leur, ils ne laissent pas de luy obeir à l'exemple de IESVS-CHRIST, qui decida cette question, se soubmettant aux Loix d'un Empereur infidele. Et quoy que la Reyne Elizabeth les ait traittez avec toutes les cruantez dōt est capable l'indignatiō d'une femme toute-puissante, ils n'en ont pourtant conçu aucune auersion pour les Roys ses successeurs. Tellement que cette Monarchie est deffēduē par des peuples persecutez, cōtre des rebelles que leur Prince auoit cōblez de biēs & d'honneurs. Ces peuples grossiers sont deuenus polis & humains, & l'Angleterre, que les Cours de tant de Roys auoient polie, est deuenue

uenüe barbare, & n'est aujourd'huy qu'un repaire affreux de mōstres, qui ne se repaissent que de sang & de chair humaine.

Hé bien Princes Chrestiens, ne secondez-vous pas les efforts puissants de cette genereuse Nation? cette mauuaise & ruineuse politique ne perira-t'elle jamais? laquelle enseigne à tous les Princes de secourir les rebelles les vns des autres, comme ils ont pratiqué de tout temps à leur propre ruine, puisque les peuples s'en enhardissent & se portent plus facilement à la rebellion, sçachant qu'ils seront soustenus des autres Princes contre les armes de leurs Souuerains. Serrait-il dit que toutes les rebellions ont esté triomphantes par la faute des Monarques, & que tous ceux qui embrassent le party de la Monarchie perissent par leur mauuaise politique? il est temps ce me semble qu'ils changent de maximes, il y a peu de Princes qui par vne compassion iuste n'ayent resenty les funestes efforts & consequences de ces secours & encouragements; les enfans ne seront iamais obeïssans si la mere les desrobe tousiours aux verges du pere, & que le pere en fasse de mesme quand la mere les a trouuez dignes du fouët. Ce Motif regarde l'Espagne aussi-bien que la France, parce qu'elle en a tiré de tout temps de bons soldats aussi-bien que nous.

Nous sommes aussi obligez en honneur de nous venger de l'infraction des conditions du mariage de la Reyne d'Angleterre fille, sœur, & tante de nos Roys; nous la deuons reestablr dans ses droits & dans le Throsne, si nous ne voulons perdre le tiltre de Protecteur des Princes opprimez, que nous auons acquis en tant d'illustres occasions, & particulierement en Sauoye.

Ie ne rapporteray point icy, toutes les obligations que la maison d'Austriche a à la Couronne d'Angleterre, ie diray seulement que les pensionnaires d'Espagne, qui ont tousiours preualu en nombre & en autorité parmy les Anglois, ont esté cause de leur ruine, en suiuant vne politique aiustée à leurs interests particuliers, & à ceux d'une Couronne estrangere. Ils ont tousiours detourné le reestablissement des Princes Palatins, pour ne point troubler les victoires de l'Empereur; ont donné des ialousies & de l'aersion à la France pour

l'Angleterre, en portant trop vn party, qui ne leur pouuant faire de bien, leur a causé beaucoup de mal. Ministres interessez que le Roy d'Angleterre deteste trop tard, & qu'il éuitera desormais comme vn escueil fatal, où le Roy son Pere a fait naufrage.

Que les Estats
de Hollande
doient resta-
bler la Couron-
ne d'Angleter-
re.

Les Estats de Hollande doiuent leur liberté à la Couronne d'Angleterre, la Reyne Elizabeth les assista puissamment dans leur fortune naissante, & ils eussent eu peine de sortir des eaux où la nature les auoit enseuelis, si l'Angleterre ne leur eust presté la planche, depuis ce temps-là le Roy Iacques successeur d'Elizabeth, voulant leur rendre l'obligation toute entiere, leur remit entre les mains des places importantes, comme Bril, Fleissingue & autres, qu'ils auoient engagées à la Couronne d'Angleterre dans leur necessité.

Si les Roys d'Angleterre ont contribué à l'establissement de cette Republique, ils n'ont pas eu moins de soin de sa conservation, en les assistant contre toute sorte d'ennemis, & leur accordant des priuileges en Angleterre, que ie puis dire estre mesme preiudiciables à leurs subiets, comme la pesche de la morue & du hareng, qui est vne des grandes richesses de la Hollande, & qui se fait sur les costes d'Angleterre. S'il arriue que cette Couronne degenerate en Republique; les Hollandois peuuent bien s'attendre qu'on les sevrera de ce priuilege, n'appartenant qu'à des Roys de faire des liberalitez de cette nature, veu aussi que les Republiques se preualent de tout, & que la Noblesse estant perie, tout le monde deuiendra Marchand ou Artisan, ce qui sans doute sera tres-preiudiciable à la Hollande, d'estre voisine d'une Republique si puissante, ce qui est desia tres-facile à iuger, Fairfax ayant admis les Iuifs qui quittent Amsterdam, pour se venir establir à Londres, bref le proverbe dit, que les gros poissons engloutissent les petits.

Ie pourrois joindre à toutes ces raisons le gage importât que les Estats de Hollande ont reçu de l'alliance, & de l'affection des Roys d'Angleterre, par l'honneur qu'ils leur ont fait de leur donner vne belle Princeesse pour femme du Prince d'Orange, qui n'estant pas leur Souuerain, mais seulement leur Gouverneur bien-aimé. L'on peut iuger que c'est

plustost aux Estats qu'au Prince d'Orange, qu'on a donné cette Princesse pour vn ostage precieux d'une parfaite intelligence entre la Hollande & l'Angleterre.

La flotte d'Espagne qui fut deffaite par les Hollandois il y a dix ou douze ans sur les costes d'Angleterre, comme nous auons dit cy dessus, est vne obligation qui ne doit pas estre moins sensible à la Hollande qu'à la France, pour ne pas dire dauantage.

Si les Princes Protestants d'Allemagne, & les autres Estats de mesme croyance sont sensibles aux interets de leur Religion, ils doiuent armer contre les meurtriers du Roy d'Angleterre, qui ont renuersé leurs Autels, & prophané la plus esclatante Eglise Lutheriene qui fust dans l'Europe. Car personne n'ignore qu'il y auoit vne Hierarchie en Angleterre, des Eglises Cathedrales, des Chanoines, des ornemens, des Ceremonies, & autres beaux restes de l'Eglise Catholique, que les Fairfaciens ont effacez pour establir vn chaos & vn ollopodride de toute sorte de Religions.

Que les Protestants d'Allemagne doiuent reestabli la Couronne d'Angleterre.

Mais entr'autres, les Couronnes de Dannemarc & de Suede doiuent s'interesser par ce motif dans le reestablissement du Roy d'Angleterre, parce que ce sont les deux seules Monarchies qui subsistent, nonobstât la profession de la croyance de la pretendüe Reforme, qui semble estre incompatible avec l'Estat Monarchique, comme nous auons veu presque en tous les endroits où elle s'est establie, & où elle a preualu. Que si cette verité est confirmée par la cheute de la Couronne d'Angleterre, les Couronnes de Dannemarc & de Suede doiuent craindre ce me semble, & tascher de la dementir en reestablissant le Roy d'Angleterre, & faisant voir que l'on peut estre Protestant & Roy tout ensemble.

La Couronne de Dannemarc a pour motif particulier l'alliance du Sang, le Roy Iacques pere du Roy deffunct, ayant espousé la sœur du feu Roy de Dannemarc, & partant l'ayeule du Roy d'Angleterre d'apresent.

De plus, si la Monarchie subsiste en Angleterre, ses Roys auront tousiours quelque communauté d'interest avec les Protestants d'Allemagne, tant pour la Religion, qu'à cause du Palatinat, qui est le Patrimoine de leurs plus proches.

Les Princes Palatins sont Cousins germains du Roy d'Angleterre.

Les Saxons qui se sont autrefois rendus maistres de l'Angleterre à la pointe de l'espée, & laquelle conserue encore aujourd'huy beaucoup de leur langage, de leurs coustumes, & du sang de leurs plus illustres familles, souffriront-ils que toute leur gloire ancienne soit estouffée par vne lascheté presente? en laissant perir ces familles genereuses qui se sont cōseruées dans l'honneur & dans la gloire pendant tant de siècles, & qui sont demeurez Maistres de l'Angleterre par vne si longue prescription? Si l'on exterminé toute la Noblesse en Angleterre, comme on y traueille desia avec insolence & cruauté, ie croy qu'il n'y demeurera gueres de ces familles Saxonnnes, qui possèdent titre de Noblesse, & par leur conquête & par leur naissance.

L'Italie a aussi de grandes obligations à l'Angleterre, & beaucoup d'interest à son reſtablishement, puisque ses Roys ont tant de fois sauué le Saint Siege, qu'ils ont armé si puissamment pour la deffence de l'Eglise, & ont enfin mérité par leurs escrits & par leur valeur le titre glorieux de Deffenseurs de la Foy, qu'ils conseruent encore à present; Ce seroit vne consideration trop basse, de dire que les Italiens possedoient autrefois les meilleurs biens de l'Eglise en Angleterre. Il suffira de dire que la premiere alliance que Fairfax a faite ç'a esté avec le Turc, & que sa Politique & ses interests l'obligent comme necessairement de s'attacher à ceux de ce voisin ennemy irreconciliable de l'Italie, & que tout au contraire dans les saintes expéditions qui se sont faites pour la Terre-Sainte, & pour repousser ce commun ennemy de la Chrestienté, les Roys d'Angleterre s'y sont portez avec toute sorte de pieté & de courage. Et de vray il n'y a point de Prince dans l'Europe, qui puisse plus promptement secourir l'Italie, à cause de la quantité de ses Ramberges qui sont comme autant de forteresses mouuantes, qu'il peut faire voler pour ainsi dire de l'Océan dans la Méditerranée.

Il est encore à considerer, qu'il n'y a point de Souuerains dans l'Europe qui gouernent leurs Sujets avec plus de severité que les Princes d'Italie, & que l'exemple de l'Angleterre est capable d'inspirer dans leurs peuples, plus que dans aucuns autres qui souffrent moins, cét esprit de reuolte & de rebellion.

Il n'y

Il n'y a point aussi de secours qui soit plus capable de donner de la veneration à l'Eglise Catholique aux Anglois, que celui de l'Italie, & particulièrement celui du Saint Pere; & au contraire si le Pape abandonnoit maintenant les Irlandois, on douteroit iustement qu'il fust le Pasteur du peuple Chretien, puis qu'il le laisseroit ainsi deuorer aux loups rauissans de son troupeau, l'on diroit qu'il n'a soin que des brebis qui ont beaucoup de laine, & qu'il aime mieux les voir esgorger lors qu'elles sont vn peu maigres & indisposées, que de prendre le soin de leur faire recouurer la santé, en remediand aux maux qui les affligent.

Les Histoires sont toutes pleines des secours que la Couronne d'Angleterre a presté de tout temps à tous les Princes & autres Estats de l'Europe, où ie renuoye le Lecteur curieux, pour ne pas copier icy des volumes entiers. Venons donc à nostre troisieme point d'honneur, qui fera voir que la Couronne de France & la maison d'Autriche sont obligez de secourir le Roy d'Angleterre, pour se purger des calomnies dont on les charge, d'auoir contribué aux malheurs de l'Angleterre, & de n'y auoir pas remedié lors que l'honneur de la Monarchie & l'interest de l'Eglise le requeroient. Commençons par les causes les plus esloignées de la decadence de cette Monarchie, & de la ruine de la Religion Catholique en Angleterre, dont on accuse l'Espagne, & dont elle ne sçauroit se lauer, qu'en produisant des actions dignes d'vne Maison, qui a tant fait gloire de cherir la Monarchie, qu'elle l'a voulu rendre vniuerselle, & qui porte le tiltre glorieux de Catholique. Quand on est dans le vin on querelle ses meilleurs amis, & quand on est frappé dans l'obscurité on s'en prend à tout le monde.

Henry VIII. enyuré de sa passion desreglée, & aueuglé de quelques crimes touchant la Foy, accusoit le Pape & le Roy d'Espagne de tout son mal, & disoit qu'ils s'opposoient trop à son interest & à son contentement. Ses successeurs voyant les desordres, que les diuerses sectes qui se sont esleuée sur les ruines de la Religion Catholique en Angleterre, y ont apportez, & mesme les Catholiques sensibles de la subuersion de tant d'Autels, & de la perte de tant d'ames, sou-

stiennent, que l'Espagne deuoit plustost souffrir que Henry VIII. repudiaſt Catherine Princeſſe de leur ſang, que non pas de ſe roidir contre vne paſſion qui a cauſé tant de malheurs à l'Egliſe de Dieu; & aux peuples d'Angleterre; & pour appuyer leur raiſonnement, ils diſent que Henry VIII. tres-inconſtant pour les femmes, euſt ſans doute repris ſa femme legitime, apres auoir contenté ſa fantaſie d'Anne de Boulan, qui auoit eſté aſſez fine pour ne luy rien permettre iuſques à ce qu'il l'eueſt eſpouſée.

Ces eſprits rafinez qui gloſent ſur tout, aduoient bien que l'Espagne voulut reparer ſa faute, ſous le regne de Marie d'Angleterre, qu'il eſpouſa, où la Religion Catholique fut reſtablie, mais ils diſent que ſon intereſt propre luy fit negliger les moyens qui y eſtoient les plus neceſſaires, & l'empêcherent d'arracher la racine du mal, d'où ſont fortis les malheurs qui accablent aujourd'huy l'Angleterre.

La Reyne Marie eſtoit fille d'Henry VIII. & de Catherine d'Espagne; Mais du liēt de ſon Pere, & d'Anne de Boulan, elle auoit vne ſœur nommée Elizabeth qui luy a ſuccédé.

Les plus ſenſez de ce temps-là eſtoient d'aduis qu'on enfermât Elizabeth dans vn Monaftere en quelque endroit du monde, d'où elle ne ſortitſt iamais, les autres opinoient iuſques à la faire mourir, parce qu'ils iugeoient qu'apres la mort de Marie qui ne promettoit pas de viure long-temps, Elizabeth, ou pour ſe venger du Pape qui n'auoit pas voulu approuuer le mariage de ſa mere, ou craignant que pour les meſmes raiſons le ſaint Siege n'apportaſt de l'oſtacle à ſon installation à la Couronne, & que partant elle ne ſe pourroit maintenir que par les ennemis du ſaint Siege, ils iugerent diſ-je qu'elle logeroit ſon intereſt, & le principe de ſa ſubſiſtance dans l'eſtabliſſement de l'Hereſie.

Mais Philippe qui ne vouloit pas laiſſer tomber de ſa Couronne vn ioyau comme l'Angleterre, & voyant Marie fort valetudinaire, taſchoit de ſ'inſinuer dans les bonnes graces d'Elizabeth, qui luy deuoit apparemment ſucceder comme elle fit bien-toſt apres. Car Marie ne regna que ſix ans. Pour moy ie veux croire que ce Prince euſt horreur de conſentir

à vne telle violence, outre qu'Elizabeth faisoit la zelée, & promettoit d'estre bonne Fille de l'Eglise. Mais Marie ne fust pas si-tost morte qu'elle se monstra digne fille de sa Mere, obligea Philippe à se retirer, ne voulant point d'autre mary qu'une liberté absoluë, ny d'autres enfans à allaiter que cette hydre d'heresie qui deuore aujourd'huy l'Angleterre.

Les remedes que l'Espagne a voulu apporter à ce mal, n'ont fait qu'aigrir, & renouueller les playes. Cette flotte formidable qui faisoit gemir l'Ocean sous la pesanteur de ses vaisseaux, cette forest mouuante, qui descendoit comme vn ciel tout de feu sur l'Angleterre pour la consommer, ne seruit qu'à eschauffer la rage & la fureur de l'Herésie, & à pretexter l'effusion du sang Catholique, dont elle s'est nourrie & renduë puissante à vn point que de renuerfer le Throsne & les Autels.

Les Espagnols ont desbauché continuellement les Catholiques d'Angleterre de l'affection de leurs Princes, pour les faire seruir à son ambition, d'où sont prouenuës les persecutions & les pretextes qui ont couuert cette horrible rebellion là; personne n'ignore que les Puritains voyant les pensionnaires d'Espagne si puissants dans la Cour, la pluspart Catholiques, prirent occasion de là, de persuader au peuple que le grand dessein de la Cour estoit de remettre l'Angleterre sous la tyrannie du Pape, pour suiure leur langage, & le peuple ialoux de sa Religion s' alarma de cette crainte, & se porta à des violences qui espaulerent la rebellion.

Ores les choses de cette nature n'ayant point d'euidence certaine, comme l'on peut refuter ces calomnies, de mesme les peut-on appuyer. On peut dire que le Roy d'Espagne deuoit plustost perir que de permettre qu'Héry VIII. repudiaist sa sœur, apres en auoir eü vn Prince & vne Princesse fille, & auoir demeuré de longues années avec elle. Pour les pratiques que cette Couronne a eu avec les Catholiques, on peut dire, & non sans raison (puis qu'ils ont receu de grands bienfaits de l'Espagne, par de belles fondations qui se sont faites tant en Espagne qu'en Flandres, pour l'education des Ecclesiastiques Anglois) que le zele pour le reestablishement de la Religion Catholique en Angleterre, a obligé l'Espagne

à nourrir ces intelligences avec les Catholiques Anglois.

Mais la chose dont on peut assurément accuser la maison d'Autriche, est que durant les guerres Civiles d'Angleterre, elle n'a presté aucun secours au Roy; d'où ie conclus que, pour leuer toutes ces calomnies, & faire voir que la guerre qu'elle auoit avec la France, a esté le seul obstacle qui l'a empesché de secourir le Roy d'Angleterre. L'Empereur & le Roy d'Espagne sont obligez de contribuer de tout leur pouuoir à la paix generale, & de restablir Charles II. Roy de la Grand' Bretagne. L'on charge encore l'Espagne d'une autre calomnie, mais parce qu'elle luy est commune avec la France; nous la joindrons à celles, dont on tache l'honneur de la France, qui a de tout temps protégé les peuples & les Princes opprimez.

La guerre ne fut pas si-tost allumée entre la France & l'Espagne, que ces deux Couronnes commencerent d'auoir ombrage de l'Angleterre, parce que ce Royaume est capable d'emporter la balance de quel costé qu'il prenne parti. Motif tres-puissant pour porter la France & l'Espagne à travailler à l'enui au restablissement de cette Monarchie, dont l'une & l'autre pourront tirer avec vsure cy-apres des secours contre leurs ennemis.

Ces ombrages & ces craintes communes entre la France & la Maison d'Autriche, leur firent souhaiter à toutes deux que l'Angleterre fust employée chez elle, & les rafinez Politiques disent, que l'une & l'autre travaillerent à broüiller l'Angleterre, & à luy tailler de la besongne, l'Espagne par le moyen des Catholiques, & la France par celui des Escossois. Les Espagnols dont les actions sont pleines de faste, firent esclater leur zele pour la Religion Catholique par des pensions & des liberalitez; Et cét esclat qui rend nos charitez infructueuses, & que l'Escripture condamne, donna vn tel ombrage aux Escossois qu'ils en prirent l'alarme; & encouragez (ce dit-on calomnieusement) par feu Monsieur le Cardinal de Richelieu, ils armerent & leuerent le masque à la rebellion. Tellement qu'il semble que l'Espagne mit le feu d'un costé & la France de l'autre. Mais il y a cela de différent, que l'Espagne commença le jeu conformement aux
projets

projets dont nous auons parlé cy-dessus , & que la France tout au plus ne s'est seruie que de l'occasion , & n'a point coloré cette pratique (si tant est qu'il y en ait eu) d'un faux zele pour la Religion, comme a fait l'Espagne, qui s'est toujours seruie des autels pour esleuer ses hauts desseins & son ambition.

La seconde calomnie dont on charge la France luy est encore commune avec l'Espagne, qui est de n'auoir point secouru le Roy d'Angleterre, dont elle se iustifie sur ses guerres domestiques & sur la necessité de ses propres affaires, auxquelles on doit estre plus sensible qu'à celles d'autrui. Et veritablement il faut croire que si la France se fust seulement imaginé, que des subjets se fussent portez à ce haut point de barbarie que de mettre à mort leur Roy, elle eust abandonné le cours de ses conquestes, & mis bas les voiles que des vents fauorables enfloient en poupe, pour s'opposer à vne violence de cette nature, qui rejallit sur toutes les testes Couronnées; Et pour preuue de cette verité l'on peut dire, avec autant de raison & de fondement, que dans la premiere calomnie, que l'armée Escossoise, qui entra l'Esté passé sous la conduite de Monseigneur le Marquis d'Hamilton, pour deliurer le feu Roy, fut vn ressort de la France, qui ne pouuoit secourir la Couronne d'Angleterre de ses propres forces.

Nonobstant toutes ces justifications, la France est obligée en honneur de dementir ces calomnies, par vn prompt secours qu'elle doit prester au Roy d'Angleterre, & employer tant de braues Capitaines au retablissement d'une Couronne, dont la ruine n'est pas seulement honteuse, mais encore preiudiciable à toutes les puissances Souueraines, & d'eseraser l'orgueil de ce rebelle vsurpateur, qui fut assez impudent, que de respondre aux Ambassades des Princes Chrestiens (qui tascherent de destourner le meurtre du Roy, en luy donnant de justes apprehensions de la vengeance de leurs Maistres) qu'il ne les craignoit pas, & qu'il auoit de quoy les bien receuoir.

Le dernier & commun interest de tous les Princes & Estats de la Chrestienté, est que la paix generale estant con-

Dernier motif
des Princes
Chrestiens.

clüe, leurs pais se verront incommodez des gens de guerre, qui seront hors d'employ : Les enuoyant en Angleterre ils en seront deliurez, & comme ce Royaume-là abonde en vaisseaux, les rebelles estant reduits & le Roy restabli, on pourra mettre en mer ces troupes desia accoustumées à vaincre des barbares dans ce coup d'essay de l'Angleterre, & les transporter en Turquie, où pour récompense d'auoir sauué vne Couronne temporelle, ils en remporteront d'éternelles en restablisant la gloire de IESVS-CHRIST.

Qu'il est tres-facile de restabli-
r le Roy
d'Angleterre.

Quoy que la valeur des Princes Chrestiens soit telle, qu'ils n'estiment rien de difficile ny de dangereux, neantmoins comme ils sont prudents aussi bien que valeureux, & qu'ils ne voudroient pas exposer legerement leur honneur, ny la vie de tant de braues hommes, qui les accompagneront dans cette expedition; faisons voir que dans l'entreprise à laquelle ie les exhorte, il n'y a que des roses sans espines à cueillir, & de la gloire sans danger & sans trauail.

Vous sçauiez que la Couronne d'Angleterre est composée de trois Royaumes, de l'Angleterre, de l'Escosse & de l'Irlande, qui font comme vn triangle, l'Escosse & l'Angleterre ne font qu'un continent; l'Irlande est assez esloignée de l'Angleterre, mais n'est destachée de l'Escosse que par vn petit bras de mer, l'Irlande est presque aussi grande que l'Angleterre, & tient-on qu'elle seroit aussi florissante, si elle estoit habitée d'un peuple laborieux, & ambitieux des richesses. Faisons voir que ces trois Royaumes sont obligez de restabli-
r leur Roy, pour ne point encourir le crime d'ingratitude, quand mesme ils n'y seroient pas obligez par deuoir.

Le Roy d'Angleterre a toujours eu horreur de la cruauté, & estoit persuadé qu'il n'estoit pas juste de persecuter personne pour sa croyance. Ce qui doit encore seruir de motif tres-considerable à toutes les puissances & peuples de l'Europe, puis qu'il n'y a point de Religion Catholique, Caluiniste ou Lutherienne, qui n'ait trouué vn azile en Angleterre, sous le Regne de ce Prince. Il y auoit à Londres vn Conuent de Capucins, il y auoit vn Temple François, vn Flamand & vn Italien qui professoient la Religion de Genéue, & quoy qu'il

soit tres-dangereux à vn Estat de permettre plusieurs Religions; ce Prince toutesfois n'a iamais voulu violenter personne, & à mieux aimé estre estimé charitable Chrestien, que seuer Politique; Ce n'est pas que la Reyne Elisabeth n'eust establi de seueres Loix contre les Catholiques, & que le Roy Iacques son Pere, ne luy eust bien recommandé par son βασιλικὸν δῶρον, de ne point admettre les Calvinistes à la Communion de son Eglise, mais il y a eu tousiours horreur de la seuerité de ces Loix & de ces Maximes, & a crû que sa bonté les obligeroit tous à se tenir dans les termes de la fidelité & de la reconnoissance. Neantmoins les vns & les autres ont esté cause de sa ruine, & partant sont tous obligez de venger sa mort, s'ils ne veulent estre noircis eternellement de la plus haute ingratitude qui fust iamais.

Les Protestants ayant ainsi aigry les Calvinistes en les voulant obliger à embrasser leur Religion; Ils se reuol- Pretexte de la
rebellion d'An.
g' terre. tent, ils arment en Escosse, & entrent en Angleterre pour secourir leurs Freres. Les Catholiques cōtribuerent aussi innocemment à ce malheur, parce que l'indulgence que le Roy auoit pour eux, seruit de pretexte & d'espouuantail aux Calvinistes, par lequel ils animerent les peuples contre le Roy, luy persuadant qu'ils prenoient le grand chemin de tomber, comme ils disent, sous la Tyrannie du Pape.

Les Catholiques ont peché d'ingratitude enuers le Roy, en ce que le voyant en vne extreme necessité de se seruir d'eux, ils ont exigé de luy des choses qu'ils sçauoient qu'il ne pouuoit pas leur accorder, ny par interest, ny par bien-seance. Neantmoins l'ardeur avec laquelle ils se portent maintenant en Irlande pour venger sa mort efface desia cette tache, qui a tousiours trouué son excuse dans le zele pour la Religion, que l'on doit preferer à toutes les considerations humaines. Monseigneur le Marquis d'Ormond leur Vice-Roy a tant fait par sa prudence, qu'il a vny trois ou quatre partis en Irlande qui auoient tous des forces sur pied, & l'armée du Roy est à present de vingt-quatre ou vingt-cinq mille hommes, & mesme cette vnion estoit projectée, & presque acheuée deuant la mort du Roy. Le Prince Robert Palatin Admiral & Cousin du Roy, encourage ce parti en nettoyant les mers, &

resserrant les Fairfaxiens dans leurs Ports, & faisant plusieurs prises d'importance sur eux, de façon, que si le Prouerbe est vray qui dit; *Who Will England Win With Irland he must Begin:* c'est à dire, *qui veut conquerir l'Angleterre doit commencer par l'Irlande.* Nous pouuons à ce Prouerbe Anglois, ioindre cette sentence Latine. *Dimidium facti, qui bene cæpit, habet,* *l'affaire est à demy faite, quand elle est bien commencée.*

Les Escossois
sont obligez de
retablir leur
Roy

Mais parce qu'il y a vne mer assez grandre & assez dangereuse à passer d'Irlande en Angleterre, & que le traicté est fort petit de la en Escosse, il seroit important que les Escossois s'unissent avec les Irlandois, comme ils y sont obligez par des raisons tres-puissantes.

Premierement le Roy deffunct est descendu du Roy Iacques Roy d'Escosse, sous lequel les deux Royaumes se sont vnis, il estoit natif d'Escosse, & luy & le Roy son Pere a rousiours fort aduancé les Escossois à la Cour d'Angleterre, iusques à donner mesme de la ialousie aux Anglois.

En second lieu, ils ont les premiers leué le masque à la rebellion, & ont mis les armes à la main à Fairfax; & en troisieme lieu ils ont liuré la personne du Roy à ses rebelles & à ses meurtriers. Je veux qu'ils ayent des raisons pour se deffendre, mais elles ne sont pas si puissantes qu'il ne faille de bons & solides effects pour les autoriser; ils ont coustume de dire qu'ils ont armé pour la deffence & propagation de leur Religion, comme s'il estoit permis à des subiets de leuer les armes contre leur Souuerain pour le forcer, & vn grand Royaume commel' Angleterre, à embrasser leurs opinions aussi ieunes & aussi mal fondées que celles des Anglois, cela ne seroit pas permis aux Catholiques, & I E S V S-CHRIST n'a jamais estably son Euangile par les armes & par le carnage. Quand ils ont liuré le Roy contre la Foy promise, ils disent qu'ils auoient affaire d'argent, que cét argent leur estoit deu pour les frais de la guerre qu'ils auoient faits pour les Anglois, qu'ils n'ont liuré le Roy qu'à condition que les Anglois le restabliront, & bref qu'ils ne croyoient jamais qu'ils le traitassent de la sorte. Ces raisons-là sont fort foibles, & ne sauueront pas leur honneur sans de bonnes actions, & puis toute l'Escosse n'a pas esté du Conseil,

seil, & ie crois que l'auarice de quelques particuliers qui tenoient le haut du paupé alors, ont attiré cette vilaine tache sur leur Nation qui a disputé de la valeur & de la generosité avec toutes les Nations de l'Europe; aussi auons-nous veu perir l'Este passé vne armée de vingt-mille hommes, pour venger leur honneur, & deliurer de prison le Roy que leurs compatriotes auoient liuré. Les Escossois sont trop vaillants pour souffrir que le dementy leur demeure, & ont le cœur trop bon, pour deuenir vne Prouince d'Angleterre, & suite laschement les loix d'un tyran, & d'un meurtrier de leur Roy & de leur compatriote.

Qu'elle opinion la France pourroit-elle auoir deux, s'ils en demeuroient-là? elle auroit honte de conseruer avec eux l'ancienne & inuiolable alliance, qui a de tout temps vny ces deux Couronnes, comment leur pourroit-on fier la garde de la personne Sacrée de nos Roys, s'ils souffroient qu'on les accusast (sans se iustifier par la force, qui est la plus sincere iustification) d'auoir trempé dans la mort de leur Prince, oncle maternel de nostre Roy? De quel œil le Roy de France pourroit-il les considerer aupres de sa Personne, lors qu'il y verroit aussi des Cousins Germaines exilez & despoüillez de leurs Estars par la lascheté de l'Escosse? Pour moy ie ne sçauois m'imaginer comme la France pourroit croire qu'ils fussent affectionnés à la Monarchie & au Sang de Bourbon, s'ils le traittoient si mal chez eux? Et comment l'inclination ou l'interest les pourroit il redre fideles aux Roys estrangers, s'ils violoient toute sorte de droits pour destruire leurs Princes legitimes, qui n'ont iamais peché enuers leurs subiets, que par des excez de bonté?

Mais si cét interest n'estoit pas assez sensible, parce qu'il est temporel, que la consideration de leurs freres qui iouissent icy de la liberté de leurs consciences par l'indulgence de nos Roys, les porte à soustenir la Monarchie, cette infamie rejalliroit sur toutes leurs Eglises, & les Princes Catholiques les considerant comme ennemis de la Monarchie, estoufferoient des serpents, qu'ils croiroient ne se pouoir nourrir que de sang Royal.

Ostez au plustost, Messieurs, cette tache infame de des-

sus vostre Nation, & de vostre Religion, faites voir par la
 vengeance que vous tirerez du Parricide de vostre Roy, que
 vous n'y auez nullement trempé, & que lors que vous l'auiez
 liuré, il y a eu plus d'inconsideration que de crime, & que la
 faute n'a pas esté general. Employez pour vos Roys, cette
 valeur que vous auez de tout temps si glorieusement exer-
 cée pour les Roys de France: faites par deuoir & par interest,
 ce que vous auez fait si souuent par generosité & par inclina-
 tion: sauuez la Couronne d'Angleterre, comme vous auez
 fait celle de France: ne souffrez pas que les Irlandois ayent
 tout l'honneur de cette action: qu'on ne tire point de vostre
 lascheté vne consequence aduançageuse que leur Religion
 est plus Chrestienne que la vostre, parce qu'ils obeissent
 mieux à ce commandement du commun Souuerain, *rendez à*
Cesar ce qui appartient à Cesar. Ils y sont moins obligez que vous,
 puis que les Roys d'Angleterre professent vne Religion con-
 traire à la leur, & que leurs predecesseurs les ont persecutez.
 Mais ie vous offence Messieurs, pardonnez au zele qui m'em-
 porte, vous n'estes que trop disposez à cet illustre dessein: les
 cœurs genereux ne veulent pas estre animez, & la seule gloi-
 re fait tout leur motif & tout leur recompense.

Quelqu'un me pourra dire qu'il est très-difficile que les
 Irlandois & les Escossois s'accordent dans vne mesme en-
 treprise, à cause de la diuersité de Religion. Mais que l'on
 considere nos guerres avec l'Espagne. Il y a des François
 Catholiques, il y en a d'Huguenots; nos armées sont com-
 posées indifferemment des vns & des autres, quoy que ce ne
 soit pas pour des interests si importants, comme pour venger
 le meurtre d'un bon Roy, ny pour aller au deuant de la ty-
 rannie estrangere, qui est le danger dont sont menacez l'Ir-
 lande & l'Escosse: neantmoins chacun sçait combien de
 concorde, de sympathie, & d'union il y a tousiours eu dans
 le Corps de la France, & dans les armées: à qui a dessein de
 bien faire, tout est possible.

Je ne parleray point de l'interest qui oblige les Anglois à
 reestabliir leur Roy, ie ne ferois qu'aigrir leurs playes, qui sont
 encore toutes recentes du coup fatal qui viét de frapper leur
 sacré Souuerain. Je diray seulement que les Catholiques y sont

obligez par le mesme interest que les Irlandois, les Caluinistes par celuy des Escossois qui ont tousiours esté vnis de Religion & d'interest auec eux : & pour les Protestants ils y sont obligez par la dependance que les membres ont au chef, & tout le corps au cœur d'où il tire sa chaleur & sa vie.

Tellement que les Irlandois & les Escossois auront tres-bon marché de Fairfax, qui pour toute protectiō tant humaine que diuine, n'a que cette armée composée de brigands & de scelerats, qui ne furent iamais de bons hōmes de guerre, principalemēt quand ils ont fait leur fortune : vn soldat riche estant aussi facile à vaincre qu'un pourceau gras est aisé à assommer, & le sang de l'un & de l'autre a vne vtilité qui encourage; c'est vn grand aduantage pour vne armée de n'auoir rien à perdre, & d'auoir beaucoup à gagner.

Toute l'Angleterre deteste le procedé de Fairfax, tout le monde est las de sa tyrannie, la moindre force estrangere, qui l'attaquera, vous verrez tout le Royaume en armes, pour tirer vengeance de ses oppressions & de ses cruautéz, & la ville de Londres, qui dōne le branle à toute l'Angleterre, est si opposée à ses desseins, que le Milord Maire en a esté depuis peu emprisonné, pour n'auoir pas voulu publier la declaration de Fairfax contre la Monarchie. Mesme son parti se diuise, & ceux qui ont porté iusques icy le nom d'indépendants, ne veulent pas releuer de l'un de leurs compagnons. Ce party est fort puissant, & se forme dans les Prouinces aussi-bien que dans l'armée. Ils ont mis au iour vn liure intitulé : La nouuelle Tyrannie.

Toutes ces bonnes dispositions me font craindre que mon travail ne soit inutile, & que les Princes Chrestiens, s'ils ne partent bien-tost, ne trouuent besogne faite, & n'ayent que le regret d'auoir contribué aux malheurs de cette Couronne par leurs detestables guerres, sans auoir eu part à la gloire de la reſtablir ; qu'ils soient donc aussi prompts à l'entreprise de cette guerre, qu'ils ont esté tard à faire la paix, que leur lenteur ne soit pas criminelle en deux ſuiets differents, qu'ils concluent promptement la paix generale pour acheminer cette entreprise vniuerselle, & que le dernier poinct du traité de leur paix porte les ordres qu'il faudra tenir dans cette iuste & glorieuse guerre.

LES NOMS DE CEUX QUI ONT CONDAMNÉ
le Roy d'Angleterre à Mort.

PARce qu'il n'est pas juste de confondre l'innocent avec le coupable, ny mesme de punir toute sorte de crimes également, j'ay bien voulu inferer icy les noms de ces malheureux, qui ont sacrifié vn iuste à la rage d'un tyran, & à l'idole de leur infame fortune.

Sic'est vne chose ridicule de voir tant de soldats trauestis qui ont quitté l'espée pour la robbe, Fairfax ne pouuant fier vne si detestable condamnation, qu'à des gens qui ne reconnoissent point d'autre droit que la force, & qui sont accoustumés au sang & au carnage, ce vous doit estre vne consolation, (gentreüse Noblesse qui auez dessein de les chastier) que vous les rencontrerez l'espée à la main à vostre abord en Angleterre. Mais ils seroient trop heureux de perir si glorieusement, il seroit iniuste de ne leur pas donner quartier, & il faut les reseruer à des bourreaux qui leur arrachent la vie par des supplices proportionnez à leurs crimes, il ne sera pas hors de propos que vous sçachiez leurs noms: si j'auois leurs tableaux ie les ferois peindre dans nos estendars avec cette inscription, *Parce plus scelerare manus*, ne rendez point vos mains criminelles, en donnant vne mort glorieuse à ceux qui meritent le feu & le plomb fondu, & ne leur donnez pas la mort, sur peine de la vie, mais reseruez les à de longs & cruels supplices.

Vous sçaurez que la pluspart de ces gens-cy sont gens de neant, & tirez de la lie du peuple, qui n'ont pas pris Seance au Parlement par election, mais qui y ont esté intrus par Fairfax, en la place de ceux qui n'ont pas voulu servir à sa tyrannie.



LA LISTE

DES NOMS DES IVGES DE LA

haute Cour de Iustice pour le procez du Roy , nommez par vn Arrest des Communes d'Angleterre , assemblées en Parlement. Et la liste des Officiers choisis par icelle pour le mesme sujet.

Thomas lord Fairfax General
 Lieutenant General Oliver Cromwell
 Commissary General Ireton.
 Major General Skippon
 Hardresse Waller,
 Colonel Valentin Walton
 Colonel Thomas Harrison
 Colonel Edouard Waller
 Colonel Thomas Pride
 Colonel Isaac Ewer
 Colonel Richard Ingolsby
 Sir Henry Mildmay
 Sir Thomas Honywood
 Thomas lord Grey
 Philipe lord Lisle
 lord Munson
 Sir John Danvers
 Sir Thomas Maleverer
 Sir John Bowcher
 Sir James Harrington
 Sir William Brereton
 Robert Wallop Esquire
 William Henningham Esquire
 Isaak Pennington Alderman
 Thomas Atkins Alderman
 Colonel Rouland Wilson
 Sir Peter Wentworth
 Colonel Henry Martin
 Colonel William Purefoy

Colonel Godfrey Bosvill
 John Trenchard Esquire
 Colonel Harbottle Morley
 Colonel John Berkestead
 Colonel Matthew Tomblinson
 John Blackestone Esquire,
 Gilbert Millington Esquire
 Sir William Cunstable
 Colonel Edward Ludlow
 Colonel John Lambert,
 Colonel John Hutchingson
 Sir Arthur Hazlerige,
 Sir Michael Livesley
 Richard Saloway Esquire
 Humphery Saloway Esquire
 Colonel Robert Titchburn
 Colonel Owen Roe
 Colonel Robert Manwaring
 Colonel Robert Lilburne
 Colonel Adrian Scroope
 Colonel Richard Deane,
 Colonel John Oky
 Colonel Robert Overton
 Colonel John Harison
 Colonel John Desborough
 Colonel William Goffe
 Colonel Robert Duckenfield,
 Cornelius Holland Esquire,
 John Carne Esquire

Sir Will. Armine
 John Iones Esquire
 Miles Corbet Esquire
 Francis Allen Esquire
 Thomas Lister Esquire
 Ben. Weston Esquire
 Peregrin Pelham Esquire
 John Gourdown Esquire
 Serjeant Francis Thorp,
 John Nut Esquire
 Tho: Challoner Esquire
 Colonel Alg. Sidney
 John Antaby Esquire
 Colonel John Moore,
 Rich: Darley Esquire
 Will: Saye Esquire
 John Aldred Esquire
 John Fagge Esquire
 James Nelthrop Esquire
 Sir Will: Roberts
 Colonel Francis Lassels
 Colonel Alex: Rixby
 Henry Smith Esquire
 Edmond Wilde Esquire
 James Chaloner Esquire
 Iosias Barnes Esquire
 Denn. Bond Esquire
 Humph. Edwards Esquire
 Grego: Clement Esquire,
 John Fray Esquire
 Tho: Wogan Esquire,
 Sir Grego: Norton,
 Serjeant John Bradshaw,
 Colonel Edm. Harvey
 John Dove Esquire
 Colonel John Venn.
 John Foulks Alderman,
 Thomas Scot Alderman
 Thomas Andrewes Alderman,
 William Cawley Esquire
 Abraham Burrell Esquire
 Colonel Anthony Stapley
 Roger Gratwicke Esquire
 John Downes Esquire

58

Colonel Thomas Horton
 Colonel Thomas Hammond
 Colonel George Fennywicke
 Serjeant Robert Nichols
 Robert Reynolds Esquire
 John Lisle Esquire
 Nicolas Love Esquire
 Vincent Potter
 Sir Gilbert Pickering
 John Weaver Esquire
 John Lenthall Esquire
 Sir Edward Baynton
 John Corbet Esquire
 Thomas Blunt Esquire
 Thomas Boone Esquire
 Augustine Garland Esquire
 Augustine Skinner Esquire
 John Dixswill Esquire
 Colonel George Fleerwood
 Simon Maine Esquire
 Colonel James Temple
 Colonel Peter Temple
 Daniel Blagrawe Esquire
 Sir Peter Temple
 Colonel Thomas Wayte
 John Browne Esquire
 John Lowrey Esquire
 Mr. Bradshaw President
 Les Conseillers Rapporteurs des accu-
 sations contre le Roy.
 Doctor Dorislow
 Mr. Steele
 Mr. Aske
 Mr. Cooke.
 Serjeant Dandy Serjeant d'Armes
 Mr. Philips Clerc de la Cour.
 Les Messagers & Huissiers
 Mr. Walsford
 Mr. Radley
 Mr. Paine
 Mr. Powell
 Mr. Hull
 And Mr. King: Crieur.

29

29

44

43

145 *Ingenieur*

